

四庫全書

集部

欽定四庫全書

集部

龜巢稿卷十七

詳校官監察御史臣劉湄

中書臣劉源溥覆勅

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷十七

元 謝應芳 撰

詩

龜山祠詩

卓彼文靖公，早立程門雪。載道歸東南，統緒賴不絕。鳳鳴朝陽能幾時，朝棲瓊林暮棘枝。歲晚江空卜居此，毘陵草木爭光輝。邇來陵谷一再變，煙滅灰飛舊書院。殘碑斷碣落誰家，應作寒砧搗霜練。南山北山禪者流，鼓

鍾雷鳴塔廟修儒衣儒冠亦不少孰謂好賢無二周龍
鍾老諸生不言忍包羞甘棠樹下吐肝膽愛禮可得存
羊不羊存禮亦存所願或可酬渠渠一畝宮依然對滄
洲將使邑人知有東家某駿奔遵豆祠春秋

簡曹谷賓

往昔政和間結交先君子時葉公子承蔭公子舟
諸良友數嘗文會於九華隱者周先生之家其書
札之妙聲詩之佳今皆不可得而見矣區區追憶

故交輒成韻語寫去谷賓吟几為後會張本云

清交早結先君子博學自謂無恆師草堂詩史擬欲續
蘭亭字書將並馳百年陵谷變更日四海弟兄生死悲
舊字文獻掃如電獨愛羲之又有之

冬至日方欲以老况自述孫垣來侍傍說江陰
陳庠仲袁仲徵二公倡和之娛區區坐馳因用
足成此詩以代折簡

耄矣又逢長至日悽然聊作短歌行一妻一子竟契闊

兩耳兩目幾聾盲里中尚結雞豚社江上豈忘鷗鷺盟
珍重暨陽雙白璧慎毋輕用易連城

江陽鄭教諭以詩見寄褒美太過且聞時赴京
考績因次韻以餞其行

大君立極揚威靈麾斥百家尊六經出圖之馬出未已
來儀之鳳來不停萬方皆效華封祝諸將已勒燕然銘
化風覃被族麟趾聘物遠來鹽虎形雄州巨邑並庠序
歌臺舞榭舞優伶先生橫經虎皮席弟子立雪梅花庭

延陵躬耕地井井尼山聖父碑亭亭正逢海內興賢日
豈作江陰老客星泮宮芹藻得佳趣隣封草木沾餘馨
龜巢一老辱篇翰鱣堂幾時瞻典型趨裝又欲覲金闕
飲餞愧無雙玉餅淵清冰潔知者衆會有孫邕薦管寧
予以小爐閣坐卧安燠名之曰熙熙甕天孫塏
到江陰語劉小齋先生蒙篆書四字見其筆畫
清勁可喜作詩報之乃翁澹齋先輩能篆隸而
文為鄉郡所稱詩中故追美之

昔在金斗城晤言即相違今觀玉箸篆神氣不少衰澹
翁心畫傳師承古人誰秦相漢中郎殆欲肩相隨舊家
冠蓋里密邇延陵碑古意師聖筆真贗吾何疑正如善
相馬而忘牝與驪懷哉揚子雲載酒當問奇奈無縮地
術龍鍾空坐馳

周節婦陳氏吾甥也早寡賴其母撫恤之恩為
多母卒且以語付託我夫婦攜之避兵居吳中
十有餘年白首歸里一生艱苦老夫獨深知之

故書此以紀其畧云

哭夫未了又姑嫜獨抱遺孤涕泗滂沱奩具賣來營葬具
不憂寒餓死空房

二

南山石爛海揚塵風雨飄搖笠澤濱嗟嘆渭陽田舍老
辛酸同受十三春

三

狼煙未息歲仍饑蛟室相隣地亦危長夜點燈機上織

明朝換米釜中炊

四

戰骨縱橫歸路迷
烈塘疑是越來溪
良人地下應憐汝
不作王凝斷臂妻

五

裙裾藍縷著簪折
鄉井蕭條草屋卑
節孝兩全頭雪白
疇能說與史官知

臘月十四日風雪極寒大林菴主僧以佛廬落

成

冰雪堆中作梵宮
磨磚布地與金同
何當放下南泉斧
坐聽松杉萬壑風

悼熊元修徵士

落落龜巢翁
間間鷗社叟
雷陳十年交
雲水三江口
在昔鷗沙結社時
盟鷗之詞我筆之
唵風咏月意相得
絕似伯牙逢子期
朝亦詩暮亦詩
詩興動來忘渴饑
淞江太湖墨淋漓
鶴汀鳧渚生光輝
毛髮雖秋霜
光風自懷

抱不虞白石爛但覺滄洲好一朝林谷俄變遷我歸耕
我延陵田銜寃塞海笑精衛抱怨思家憐杜鵑鷗社叟
軟雙脚晏然不受功名縛社鷗尋盟還可樂第我路途
遙來往難如昨前年訪戴踐重約舟到山陰眼生膜黃
庭不寫贈籠鵝蒲萄醅酪旨且多船頭送別誦佳句且
知步武追陰何音書從此不復得我心孔竅皆茅塞清
夜悠悠思故人夢裏依然見顏色客來聞死半年久俚
俚不能將絮酒悲歌為探驪龍手三日悲風動林藪

次韻荅袁仲徵見寄

大江南岼衆山蒼巖谷深藏寶劍光
江上風波來滾滾
山中歲月去堂堂
能承書業千金產
喜有童孫咫尺長
杯酒正須朝夕醉
無勞更覓解愁方

四皓圖

天風吹斷紫芝歌
四老幡然出薜蘿
不用勒兵呼左袒
安劉功比絳侯多

二

飽如山中紫玉芝姓名誰徹九重知濟時陰有回天力
震器安然不動移

瓜隱為崑山邵濟民賦

藥壺舊懸紅杏林瓜廬今住清江潯南柯太守了無夢
東陵故侯同此心灌園自捧漢陰甕抱蔓別作黃臺吟
老我坐馳三百里何由縮地重相尋

簡袁耕學先生

馬鞍山開龜甲屏臯比之席講六經一年不見朶雲字

三月又看花雨零角中小像固垂白野史巨編方殺青
宜有詩筒繼前輩使我晉鄙沾餘馨

寄熊元修

摻別廿五月昏耄而受罔於人者多矣詩言此謬
餘從可知一笑之餘必蒙警教

愛子腹便便逢人問孝先悞傳烏鵲信剛道白雞年鷗
社詩千首龜巢稿一編何當重攜手相恤話夔蛟

次韻酬陳庠仲見貽二首

鳳凰阿閣自新巢鷗鷺滄洲只舊交
百里雲山人契闊
一簪霜雪髮蕭騷
忍看雨溺塔前蟻
怕說風掀屋上茅
樽酒論心宜有約
誰家竹裏借行庖

二

春申港上老人村
家有詩書教子孫
白首竟能安菽黍
丹心豈不合乾坤
諸生問字車載酒
滿地落花僮掃門
且喜年來忘世慮
不時杯勺醉昏昏

又和袁仲徵陳庠仲去冬所寄之作

腐草煜煜螢火生枯梨紛紛山蟻行可憐身病道亦病
猶喜目盲心不盲溪山相望數千里松竹歲寒三友盟
何當相對文字飲似昔盞簪金斗城

壽萬拙齋

蓬萊水淺鐵船歸城郭人民半是非且喜春秋今七十
能知六十九年非

二

天開壽域大無疆林下幽棲樂且康不須更覓長生藥

昭代如今化日長

三

芳茂山前種玉田芙蓉湖上采蓮船東隣西舍連花竹
渾是桃源一洞天

四

一襟秋水心無競滿面春風唾自乾可惜時無吳道子
畫圖傳向邑人看

五

菖蒲花開香滿庭
簷旌廉旆風泠泠
高堂燕客作生日
紅頰紫髯雙眼青

六

今吾故吾知不同
朱門無復掛桑弓
但將一斛葡萄酒
淨洗平生磊塊胸

七

金作狻猊燭寶薰
桃笙如水客如雲
榴花不用纏頭錦
也學吳姬舞絳裙

八

燕雀歡聲新第宅
溪山佳景古丹青
琵琶自製玲瓏曲
彈與龜巢老子聽

九

拙齋之拙意何如
天賦惺惚本有餘
欲識顏曾愚曾地
一鞭希驥莫躊躇

十

舊家青氈什襲藏
兩兒斑衣長侍傍
人生可樂有如此

一日可比三千霜

昔人謂積憂成陰積陰成雨今陰雨之久且多
竟不知何憂之積以致然也淺陋之辭姑識歲
月時乙丑夏五望後九日也

常年五月衣輕葛今年袂衣猶未脫一天凜氣陰如秋
谿山黯淡煙雲稠有時雲罅曜靈出頃刻朱光暗如漆
商羊飛來作人舞羣鳩醉甚渾無語雷聲虺虺雨浪浪
一雨十日夜亦滂人家屋壞什八九床頭泥淖生蝌蚪

疑是彼蒼媧石裂天河水漏何時竭補天無術正憂心
水鄉之田俄陸沉常州地接蘇湖境青苗在田知幾頃
農人惜苗如惜兒苗死一時真可悲全家老稚仰天哭
天若垂憐天雨粟不然歲饑方薦瘥里胥催租將奈何
贈時義夫

生民天降衷所性無不仁物欲肆侵蝕乃底失本真嘉
爾鴻鵠姿超然雞鶩羣里有賦蛇毒比屋含悲辛叫閭
聲徹天恩波活枯鱗老我無能為喜此聲譽聞願言一

簣進將來見嶙峋

貽呂雋

人生異禽犢秉德方寸許一本尊所生推恩篤諸父嗟
哉淳朴姿片言不輕吐去年赴叔難代服徒役苦索饋
復今年赤脚走風雨紛紛蕭艾中薰然見蘅杜顧予子
若孫疇能類於汝宜從竹林遊氣習變齊魯

挽徐仲清

妙年博極軒岐書晚景晏安閭里居小山叢桂蔚如故

大兒一官清有餘落成客散烏衣宅送葬人來白馬車
安得並騎箕尾去逍遙八極曳霞裾

夏五即事

貪墨何多禍蔓延刮毛龜背欲成壇千村萬落炊煙斷
田舍逃亡犬餓眠

寄王尚綱陳子儀諸友

起予每憶二三子投老于今九十年自是片雲相隔爾
如何尺素亦茫然蝦蟆產龜橫山下螭螭輸芒渴浦邊

若問龜巢舊風景月餘隣里斷人煙

簡無錫華景章

百書不如一見面此語信然胡未然燈花有約半年久
桂子已落中秋前東門種瓜抱溪甕西齋淪茗剡山泉
少遊鄉里樂如此應笑鳶飛瘴海天

寄徐伯樞

東膠山人不出村南州高士之裔孫十年曾作螻蟻夢
四壁祇有莓苔痕松分女蘿補茅屋筒引乳泉澆藥園

別來幾度屋梁月顏色宛然清且溫

寄丹陽孫秀民

翩翩白鴈秋風涼紛紛白蘋秋水香官河兩堰隔三舍
旅次一違今十霜菱芡練湖秋大熟莓苔劍井夜無光
故人知我老癡否年似伏生書盡忘

懷京口俞伯鎮

鐵甕新城舊隱居江山勝槩畫圖如五條街口多輿馬
萬卷書中老蠹魚道合不妨鄉土異情親可奈信音疎

杜鵑花與人俱好珍重題詩一寄予

洪武乙丑秋新鄭縣學以通經薦吾孫塏移文
本縣徵赴吏部塏於六經有望洋之嘆且欲辭
而不可得予以孔孟之書列乎九經塏嘗受業
故臨別示此數語勗之

猗歟古聖賢遺言存簡編孝經及論語孟子書七篇載
道繼六籍煌煌日星懸斯文覺斯民千有五百年汝生
家避兵九經失青瑣借書二三策教汝朝暮間大哉孔

孟學曾如管窺天還鄉願卒業奈汝多拙遭塌來誰薦
鶚通經乃虛傳往哉詣春官從實吐肺肝絲麻雜管蒯
博采豈舍旃天朝恩惠寬茅拔茹或連立身報君親慎
勿違至言

送楊景子以通經薦舉之京

亭亭青玉桐孤生秀中林雨露得所養歲月亦已深良
工拔奇才獻作義皇琴繫以朱絲絃鼓之丹鳳吟八風
宣九垓令人格非心鄭衛化韶濩太和無古今吾將洗

吾耳朝夕聆遺音

和景子冬至韻

隱隱鐘聲出景陽，陽生望闕賀朝忙。
勲名有日印如斗，舞蹈今朝靴滿霜。
咫尺天顏春色喜，輪囷雲物瑞光長。
錫錢張宴宸恩厚，一舉真堪累十觴。

冬至後五日承郡齋文會翌早賢長史置醴次
洽且有贈言次韻奉酬并謝不敏

文章太守誰同樂，幕府賓僚如李郭。
坎蛙誰信有奇逢。

鼓吹敢隨東海若枯腸喜得酒一澆
枵腹毋勞篋三縛
獨憐澗底老孤松春風膏雨徒優渥

初度作

重光之冬湯餅客孟光相對頭俱白
吾兒樵雪中歸來
擔頭還帶詩三百詩歌熾艾壽觴舉
呼鶴堦前舞瑤翮
安知此後境多乖五載家門毀雙壁
行年今與伏生同
兀若枯株雪霜厄樵兒遺孤主黔簿
四千里外勞相憶
我昔蹉跎四方志每見桑弧有慚色
願言膏雨發孫枝

先世衣纓復輝赫皇天於余賦亦厚才散如樗壽如櫟
語言聲音耳尚聞黑白分明眼猶識四肢百骸筋力微
頭容與心依舊直响噓素不學松喬逆理偷生正何益
曹橫山下青松宅含笑全歸待朝夕山瓶乳酒如蜜甜
苓箸寒魚鮮可食家僮荷鋤且勿忙為我插花吹鐵笛
自今每日從歡伯龜巢甕天適吾適斷送予生真上策

卧雲歌為華景章作

我昔所喜青雲人雲梯登登上星辰餘如風花落藩溷

伊人可仰不可親只今老我成枯朽愛爾巖棲卧雲叟
白雲一壑數千畝且無租稅論升斗悠悠我如雲寂寂
雲伴我雲無出岫心吾無洞門鎖一榻偃仰得自如兩
膝屈伸無不可布為被非難能我被以雲如白綾木為
枕吾未曾以雲枕頭時曲肱牀無上下亦無客別有意
氣非陳登飛鳶跼跼自炎海夜鶴總帳清於水佳哉叟
之所樂者如彼今人古人誰可擬華陽陶隱居投簪謝
朝市山中作相心未閑剛道怡雲豈無愧華山陳處士

大笑脫塵屣鳳凰銜書空往來熟睡雲臺終不起願言
學陳母學陶此身長與雲逍遙萬松嶺上老禪衲形服
雖異同清高况有煎茶好泉水活火煎來味無比詩腸
搜出煙霞語不異不同人共喜老夫耄矣筋力少尚欲
去著遊山屐細啜月團雲滿甌分卧石牀雲半席幽懷
為我一宵傾免使相望兩相憶

郡侯以蘭行年九十以詩見贈敬以次韻歷叙
平生以鳴謝臆

延陵野老家業儒舊壁頗有先人書童年愚鈍不努力
涉獵五經多缺如二十而冠三十娶取友必端無佞諛
春秋四十五十餘髮猶未白顏猶朱才如襪線不知恥
光範門前曾自譽六七八十成潦倒興來尚復歌吳趨
今年九十常晝寢誰敢效尤扳宰予雲山萬疊作圖畫
松風一壑鳴笙竽雙眸漸昏耳漸聵面壁寂寞如僧居
焉知府公特尚齒贈以大篇明月珠老夫得之感勤渠
雀躍起拜不用扶合室稚老俱驩虞

十一月廿七日得塏口信以詩志喜并記臨別
祝規之意

賣橘人從采石還口傳家信報平安路經湖北雖云遠
天近雲南不甚寒佐領謹持三尺法尊君長秉寸心丹
驛橋臨別叮嚀語應念貽謀作鏡看

自和同前詩於次年正月十三日附寄黔陽

四千里外之官去百丈牽江舸艦安新沐恩波從日下
舊家門地不冰寒洗心正在詩書澤換骨毋勞內外丹

新歲僕歸正二月家書細寫阿翁看

簡陳子章先生

身不封萬戶侯眼不識千金裘深衣幅巾避兵矛往年
零落崑山州兵餘還鄉理西疇臺笠播種襪襖收今將
蓋棺萬事休但欲服飾如前修先生舊衣巾暫爾可借
不縫人遵古制素願吾乃酬飄然長裾泉下遊監縷免致
先人羞生前相往來二老亦風流

橫山歌壽萬拙齋

橫山之顛青入雲冠冕一邑無與倫山南風景最佳處
隱居豈是尋常人此山鍾英三百載素封不乏青瑣在
向來吳下避煙塵恨不移山東入海還山喜得無崩騫
種玉舊田耕紫煙雲屏正設後堂後空翠直灑前塋前
觀雲每日烏皮几灌圃有時龍井水人家雞犬寂無聲
宛若桃源畫圖裏山中羽人年八百昔日仙宮今佛宅
丹砂未必駐童顏把酒看山真上策山乎山乎德不孤
靜而壽者山為徒美哉山禽知此意石榴枝上呼提壺

我歌橫山歌未了拙齋為我開懷抱移宮換羽作新聲
彈入琵琶歌更好百斛葡萄為傾倒

屢年作小詞或詩為萬拙齋壽癸亥夏五予以
鄉人嫁禍兒輩往崑山救之作此詩

予懷紫髯翁新作綠野堂常年初度日嘉賓四筵張虛
左待老夫酌我九醞觴甥孫舞鵠鵠絲竹鳴鳳凰情與
酒俱深飲量非汪洋今雨獨不至應憐走他鄉我我馬
鞍山絕頂遙相望橫山一髮青漏浦西日黃想像祝翁

壽有如賦高堂

留別永懷寺長老暨袁子英俞茂本通政

歸吳十載前一宿永懷寺龍鍾今兩來鹿苑廢如此佳
爾山中人法幢扶欲起清風方丈室白日靜如水門迎
老詞客問我來何自忘形亦忘年相見即相契坐啜趙
州茶並隱維摩几爐薰清我心乳供便老齒鉤簾看玉
峰山色亦為喜新知多邂逅咳唾珠玉美白首莫逆交
獨有子袁子德星聚叢林草木亦韡韡我思古先輩文

許或可擬兼旬數相過倡和不知幾庭前石榴花半落
蒼苔地長揖謝山靈歸袂霑空翠

陳德廣知事以自壽之詩見示予以其災字韻
險不和乃效唐人和意以壽之故落句如此云
哦松未了休官去隨例放閒恩更多父子一經傳有自
桑蓬初度樂如何門栽彭澤先生柳籠養山陰道士鵝
最喜孟光看案舉捧觴嬌女把香羅

德廣喜予詩和韻見貽予復答之即三月十一

日繁霜之異於頷聯書之非虛語也

繭紙寫來詩句好雞林傳去古人多
花開三月春如許
霜落五更寒奈何留客政須沽綠螳
引年何必餌金鵝
六街車馬紛馳逐自喜蕭齋雀可羅

次韻荅華以愚見寄

九隴山東舊宅遷一瓢齋裡曲肱眠
賢如栗里陶元亮
閑似香山白樂天
倡和正須歌白雪丹青何必繪凌煙
竹林諸阮多才俊
文會何時共酒船

哀詩

鐵船海上遠移家
金斗城中蔗境佳
我昔頻來桃竹杖
公方新種木蘭花
書因教子時常買
酒欲娛賓夜亦賒
春夢一場隨蜨化
老夫三歎立鷗沙

東西家

東家賣兒哭幽咽
西家鬻妻含淚別
形容總覺瘦如柴
肝膽那能硬如鐵
低田水沒欠秋租
今年夏租麥更無
妻兒舍我莫怨呼
我亦忍饑朝暮殂

重午日小酌

青年自是好遊者白首始知行路難一寸芳心徒似鐵
數莖禿髮不勝冠匏樽偶有菖蒲酒菰黍香於苜蓿盤
莫笑貧居輕速客餘生能得幾團欒

五月望日寄江陰陳庠仲

一別半年久相望百里間陽春知寡和落月見清顏
酒澄江上題詩小石灣龍鍾還念我時復夢追攀

同日寄袁仲徵

申浦水東頭悠然客馬周焦桐絃白雪芳草席滄洲昨夜三更雨今朝五月秋有懷飛不去煙樹鬱相繆

曹文質自金壇來云費延年教諭傳語且知告

老而歸閑居可喜因作詩代簡

我思故人松拍顏客來寄聲蓬藿間鱣堂講學竟將老
鳩杖拜恩今樂閑清風枕簟五柳宅白雲圖畫三茅山
雪舟未得見安道乘興豈無詩往還

朝宗鄭教諭以余去冬初度自壽之詩次韻見

貽予復和而贈之

憶昔予為廣陵客兩頰丹砂眼青白蕃禧觀裏看瓊花
坐列羣英杯飲百無何陵谷忽變改塌然斂我扶搖翮
此花天下更無雙毒手誰焚夜光璧先公舊物廣文羶
家傳喜得無難厄抱琴來坐杏花壇洋洋古操令人憶
青羶坐久琴愈清君山草木皆愉色老夫今春辱佳句
轉眼炎曦又隆赫郢斤非不妙彫鏤奈何吾衰腐如櫟
生平甚愧性聾牙老去偏懷舊知識孤舟野渡豈長閑

一壺會有千金值合歡杯酒細論文恨不能飛見三益
江流南匯春申浦海門東入陽侯宅河鮪江鱖鬪鮮新
首着之盤自朝夕費舍安如廟堂坐脫粟甘於鐘鼎食
睠我郊居樂亦然朝聽樵歌暮漁笛忘機相與白鷗眠
送窮不效昌黎伯假令秋至轉饑寒亦不題詩寄高適
賢哉子淵可矜式陋巷安貧載方策

六月初八日雨晴懷毛伯尚

去年五月涼如秋今年六月寒颼颼重雲晝暝雨連日

田家復恐沉西疇朝來日出溫風起歲不薦饑人共喜
貧家四壁屋漏痕彷彿篆書千百字忽憶山中人讀書
兩眉白能負仲由米曾漂高鳳麥高堂養親侍親側我
衣斑斕親喜色有時諸父竹林遊彈琴詠詩尊俎席人
生此樂古來少今乃熊魚兩兼得老夫每問書帶草鄉
里小兒渾不識但道墨硯池水漲苔衣碧苔衣碧池水
香思若人兮不能忘長林豐草春茫茫青松澗底含冰
霜鯉魚不隨白石爛鳳鳥有時鳴朝陽停雲之詩歌未

足玄蟬為我聲相續

哀詩

鶴長鳧短總休悲聽我山陽笛一吹黃耳再無前日信
丹心獨有上天知送行南浦成長別歸卧東山悞有期
吾老未教僮荷鋤劉伶應笑阿翁癡

讀大誥作卷歌二首

天語諄諄禍福靈風飛雷厲鬼神聽掛書牛角田頭讀
且喜農夫也識丁

二

一天風雨洗塵昏
日月恩光及覆盆
雞犬不驚田舍樂
叫囂人不到鄉村

贈陳棲雲

鶴溪之水滲浦分
一灣繚繞梅花村
窮冬萬木凍欲死
此花歸若靈光存
清如西山采薇孤
竹子白於華陽洞
口隴頭雲隱居者
誰希夷後人持一
編種樹書戴一幅
漉酒中有時醉飲
肱作枕老瓦共眠
梅樹根有時不醉

百事理可與孔公同出羣青襪布襪駿奔走今年早春
朝至尊紅雲殿前三舞袖歸來滿腹懷絲綸諄諄語鄰
里切切教子孫子孫不但力耕稼徵輸能為公家勤編
氓租斛足萬計雞犬不驚安老親短檠燈火讀大誥喜
色夜夜燈花親甌窶滿篝秫田熟歲釀百榼醪醪春親
朋簪盃座常滿湖鮮日擊豐盤飡胸中不著愁半點雲
夢八九能鯨吞東鄰西舍靜如水夜無催科人打門安
居樂土有如此何異武陵人說桃花源老聃戒止足願

言尊所聞濁水膠可澄清鏡塵乃昏秋風挂席一相見
此意吾將三復論

贈周彥美

象賢有子付青氈家住城西綠水邊門柳數株同舊日
公租萬斛喜豐年試聽濯足滄浪曲應笑燃臍郿塢煙
朝夕酒杯長在手優游身作酒中仙

簡王尚綱

不笑幡然謝九流牽車服賈思悠悠醉吟人老香山社

詩到雞林價重不

贈詹伯遠

西北風高寒露零
牽蘿補屋撻柴荆
看雲長日烏皮几
夜夜教兒讀孝經

示孫塏

龍門一躍去年秋
徑著青袍赴遠游
半部魯論堪輔世
政須忠蓋繼前修

二

黔陽江水不勝清喜得居官濯爾纓
秦鏡照人肝膽見
邑民應在鏡中行

三

黑頭勲業志方雄
黃耳書歸見面同
斷織機中垂白母
抱孫時復倚門東

四

春雨秋風歲又寒
翁年近百足蹒跚
橫山菽粟東洲水
多行窩樂考槃

初冬感懷令垣書所居屋壁

在昔陵谷變海上十五霜歸棲失故隣乃落劍井傍百
指雉荆棘耰鉏破天荒東洲釣月磯橫山樵牧場一葦
去復來十月新稻嘗攜幼入寢門淒然北風涼吾兒婦
嫠居我孫官遠方筠籠鶴何之盆菊花自黃跛倚赤藤
杖終日徒俛偃

初度歲以為樂杜撰古樂府三章而令諸孫誦
之老夫聽之比之挽歌者歌蒿薤於柩前豈不

樂哉

龜巢老人忘食貧歲時強欲娛賓親賣琴沽酒作生日
蹲鳩爛蒸鮭菜新承歡幸有斑衣人君不見古人云酒
杯不到劉伶墳杯行莫厭頻

二

龜巢老人貌不揚觸邪之性如神羊生憎巫覡煽妖妄
疾視眇竺隲綱常耄無能為龜穴藏滄浪曲窈窕章有
時擊節呼兩郎男兒當自強

三

龜巢老人年紀多雞皮鶴髮背橐駝金丹自古無足信
鐵硯如今亦不磨坐待蓋棺歸薜蘿春有相巷有歌此
時不樂成蹉跎殘生有幾何

樵海歌為秦文仲先生作

出山志云遠樵海名非誇老夫素相知高風真可嘉早
年欲伐廣寒桂增月清輝燭天地又欲會稽雲夢伐箭
竹人無戰鬥遭鋒鏃汗青六經天下讀此志適蹉跎陵

谷俄變改青山樵侶集如雲一笑飄然入東海任公舊
日釣魚處樵屋相隣蛟室住扶桑若木有餘薪且喜路
無荆棘慮水底珊瑚樹亦多尤物不堪開眼覩樵擔弛
樵斧歌濯足滄洲弄明月興來擊節和龍吟唱我海樵
歌一闋也不學負薪讀書朱買臣也不識卧薪嘗膽是
何人白螺為杯大如斗青苔席地軟如茵有時獨酌爛
醉枕柯斧睡到日高三丈猶醺醺夢魂不到長安市長
安市上多羈旅米珠薪桂莫能賒多少伯桃寒餓死孰

知海樵之樂有如此

寄溧水開福寺長老源別流

客有溧陽雲水僧相逢曾得問南能九重日月恩光近
一壑煙霞道氣增龜紐肘懸新賜印麈談語續舊傳燈
別來老病時相憶欲覓金篦刮兩瞢

悼徐孟銘

讀盡岐黃上古書幡然讀律應時需一官再調炎州幕
二豎交攻瘴海隅賴有故人收白骨歸來鄉國瘞黃廬

杏林花落紛如雨何樹哀啼五尺孤

臘月十六日夜篝燈作兩書言不盡意夜半後
欹枕對月口占言懷命兒輩錄上耕學伯齡元
修三先生南澗海萍二講主清真一鍊師暨諸

吟友

照天蠟燭徒明月縮地神仙是子虛九十年殘臘盡
二三百里故人疎詩成唐律傾懷抱書託吳儂問起居
老我形容都變改依然貧似馬相如

任義甫生日作絕句四首以鰥居無子貧病為憾予乃以理釋之誠如吾言則不必怨天尤人而處之泰然矣

兄有遺孤骨肉親堦庭玉樹一枝春駿奔籩豆非無主
傳襲箕裘未是貧池有紅鱗堪入饌杯浮綠螳可留人
高年已過磻溪老每日懽娛莫厭頻

贈蔣居士

全家欲學老龐禪木榻蒲團夜不眠誰信室中靈照女

出門先上渡頭船

贈袁居士

羹牆欲見老瞿曇
貝葉書中日夜叅
布襪棕鞋門不出
一盂疏食勝肥甘

正月既望予奉陪邑長貳置鄉先生之祠于學
釋菜而歸兒輩謂故人楊澤臞過訪臨別作長
短句貽之余因口占以記鄉校中盛事并寄揚
為後會之約云

喜聞邑有絃歌宰哦松之丞更文采翕然敬我鄉先生
祠諸學宮儼如在區區後學尊前賢駿奔執籙忘耄年
深衣幅巾拜祠下燈月交光星滿天扶僊歸來語鄉曲
此事真能厚風俗安知好客過柴門載轂問字成虛辱
吾兒不識冰玉壺但言此客從前無醉墨淋漓灑白雪
沂雩興與曾為徒老夫此興亦不淺尚怯落梅風剪剪
少頃一百五日來蘭皋蕙晦光風轉三山湖頭舴艋舟
百花莊上逍遙遊朝陽碧樹自鳴鳳湖海詩盟尋白鷗

生平頗恨少知己晚有奇逢寧不喜朱絲重繫焦尾桐
請為鍾期奏流水

水田歌歌農務也郡縣之政租賦為急然農務
乃租賦之所自出可不急乎首言三山書所見
也一府四縣意在其中惟當道父母官念之芻
蕘有詢更當面陳其詳以備采擇

三山湖頭白水田頽岍不修年復年田家豈不憂卒歲
十室九空人索然饑腸雷鳴狀如鵠春來怕聞啼布穀

願言州縣父母官喻令蚊足憐變足古云民事不可緩
桃花雨晴春正暖文移動若風有聲畚鍤集如雲不斷
三農畎晦合羣力四邑溪山增喜色麟史重書大有年
官無負租民足食龔黃卓魯政績成一日九遷皆上卿
天子萬壽黃河清聽我老農歌太平

無錫昇佛像由暨陽而來鳴鑼鼓豎旗蓋儀從
僭侈家至以禍福惑人取粟帛無算東洲任者
老沮之巫不遜被毆且以杖塘木偶幾躓而後

去隣莊有王氏者撻而逐之予聞而喜乃力病
援筆書此以美任并異其義理之勇云

梁公毀淫祠真是霹靂手胡公能打鬼近代亦希有區
區辨惑編或有蒙醬瓠潦倒東家丘忽爾發哮吼老拳
毆妖巫拄杖擠木偶西鄰一壯夫怒挺擊羣醜捐袍偃
旗蓋脫網免疾走時予病中聞病去什八九勗哉爾東
家內省宜弗疚報本理所崇毋落豺獺後一正勝百邪
昔賢同不朽

題打毬圖

擊鞠流風自李唐官家占作狀元郎科場廢盡毬場在
芳草萋萋幾夕陽

清明後一日邂逅薦福寺長老源公話舊論詩
意甚相得明日作此詩代簡

貧如南阮甘投老喜得西枝近贊公白足有僧聽說法
江梅無閣坐觀空詩成芳草斜陽外道在殘山剩水中
一笑相忘今古意清明時節舞雩風

沈德麟母哀詞

怪底吳霜二月繁一朝摧折北堂護母儀表表真堪畫
吾輩區區豈易言斷織機中多教子分甘膝下並呼孫
慈顏最有難忘處獨倚蒼茫日暮門

洪武丁卯年詣烈塘祖墳祭掃恐朝暮即世子
孫不知所葬者為誰且追念墓松在昔為邑里
諸宰木之冠感愴寫情并圖葬穴以示兩子及
孫使識之以永其孝思其詩曰

百年兩度桑田變三世十年萬里同華表前時曾駐鶴
長松何日再蟠龍情鍾寒食蘋繁外淚灑春暉草莽中
老我客鄉歸不得空勞杜宇喚誰儂

次韻答江陰鄭教諭見寄

揚子江南山水奇杏花壇上晝陰遲
魯魚亥豕讎經史江黃河鮑閱歲時
兩邑相望三舍地九年凡寄數篇詩
恨無縮地仙人術把酒論文醉不辭

葉道士遊仙詞

海變兮揚塵翦若木兮風斤醫拗人兮寓世仍猿鶴兮
同羣冠切雲兮霞佩雜三秀兮蕭艾從喧囂兮萬籟聊
遊戲兮方之外混混兮和光忽蟬蛻兮坳堂陵虛空兮
轆渺茫一瞬息兮三千霜吾不知其果何適兮祇死守
乎康莊

輓萬拙齋

曹橫山下萬家莊喬木陰陰夏亦涼法曲琵琶彈鐵撥
高堂窈窕捧瓊漿素衣忽被青蠅污赤手幾遭猛虎傷

賀客未還來弔客老夫雙眼淚淋浪

閏六月廿九日飄風動地自黎明掘起破屋拔
樹衆皆驚懼至夜方息次早余追念疇昔憮然

作歌

三家村裏老詩翁獨木橋邊一釣篷
敗壘曾聞屯狗寨荒湫猶說是龍宮
勢傾東海前年雨力撼南山昨日風
可笑生來誇壯膽兩番如阮哭途窮

葛節婦

葛節婦家住崑山陽芳年二十良人亡呱呱兩兒泣蘭
房一在襁褓乳口黃塵昏破鏡無復覩孤燈相伴慰淒
涼霜風自冷木自落辟廬不知秋夜長重門深閉四壁
立縑麻淚濕三年喪維時率土皆戰場疇能訓兒知義
方熊丸在篋螢在囊呼兒叉手立侍傍曾論二十篇孝
經十八章阿母授讀聲浪浪母不姑息兒能自強從師
不出鄭公鄉腹笥有書牙頰香朝夕悅親萱草堂母今
年踰五十霜菽水可歡時且康觀風使者恐未知邑有

野史揚芬芳玉峰父老來比德衛共姜我言共姜無此
兩兒郎哲哉此母非尋常盍亦作歌與史相激昂

寄清真觀提點余復初

祖餞昔年詩最好客來今雨話玄都步虛壇上三花樹
讀易牕前九節蒲恬養氣同龜息靜清修容勝鶴形癯
儒林老友袁真士曾道區區折簡無

代簡吳中衡

一夢今年一去年兩番相見兩相憐牽蘿補屋仍徒壁

賣藥修琴又斷絃
漏浦夕陽紅樹下
淞江秋水白鷗邊
何當載酒乘秋興
來往風流似雪船

寄題詹伯遠蘿屋

大車方檻檻小隱自寥寥
門掩牽蘿屋溪懸掛樹瓢
一從滄海變屢却小山招
漏浦居相近城闈路匪遙
洗心常翫易忘肉似聞韶
苔徑春風掃瓜田夏雨澆
姓名編令甲蹤跡混漁樵
蚪蚪藏書種蟾蜍作研僚
訓兒燈火夜飲客歲時朝
清白真能守緇黃不妄交
苟馬田野樂

老此聖明朝寄語青雲士巢由不見堯

雪中遣興

橫山鶴髮翁小巷龜頭舍一爐置中央四壁塗縫罅晨
粥食近午晝戶閉如夜舉足手扶杖縮頸頭蒙帕拔木
飄風靜宜麥大雪下公家租賦畢農圃犁鋤暇沽酒黃
公壚分肉陳平社有時聚親戚談謔弄杯罈有時呼子
孫舞蹈歌風雅舊竹幸平安孤松正蕭灑一笑謝梅花
騷無補亡者

贈張鍊師 名善淵

我昔諦觀韓子詩春秋書法風雅辭九流百家蘭鮑雜
直筆褒貶非無之嵩山道士姓張氏大篇春容獨稱美
嘉乃丹衷獻赤墀欲撻羌夷安晉鄙天顏咫尺千里同
母氏連環來夢中忠孝並存方寸地翩然歸袖舞春風
淵今同姓復同道愛親又與同懷抱靈修未得一品題
菘菹竟混金光草嗟予學韓年近百吟骨冰清頭雪白
內文豈無黃與緇轉首多成兩塵隔淵乎淵乎識道理

潮州老僧差可擬臨行握別敬留衣山靈起舞烟霞喜

悼大林菴主日公

三綱掣斷駕三車一笑今朝喜到家方外旦評喧衆口
淤泥藕出白蓮花

二

熊耳峰頭有客歸相逢還著舊禪衣五山十刹都傳語
莫遣閑雲出岫飛

三

憶昔雲林訪舊遊空堂六月靜如秋
焚香坐說西來意門外青松亦點頭

四

一住橫山二十年山中木石盡通禪
老夫載雪重來日誰折梅花送上船

輓無錫王

門無車馬送迎忙身混泥塗寵辱忘
澆火有時持鼠布濯纓何異在滄浪
九龍山下青邱葑雙鯉池中碧草香

生子賢如黃叔度牛醫千載並流芳

感事二首

草暗日欲落山迴路轉賒叔教呼不起誰擊兩頭蛇

二

蹊田牛奪去立仗馬令肥安得春秋筆公然決是非

邀舒文允小酌

春秋連兩年喜事忽今日佳期一百五有菜二十七呼
孫貫酒尊速客聚圭革風迴落花舞雲開遠山出鷓蚌

自相持雞蟲果誰失鄉無月旦評世乏春秋筆長揖謝
知已永言保真吉

題秦仲暘雨竹

湘山之陽湘水陰鷓鴣聲中雨泔泔此君一別知幾載
別後桑田變滄海客來今雨重相看歲寒風節依然在
餘事不須多感慨

送徐士方之登州黃縣學教諭

世態趨炎素所憎校官應喜冷如冰絲桐聲續龜山操

膏火光分海市燈大鈞六鼇將有兆高堂三鱸豈無徵
寄書黃耳還家日莫惜題詩貺剡藤

觀音柳

肉髻珠纓自在身何緣化作柳中人三眠未足扶風起
似怯春寒翠黛顰

羅漢松

余素拙詩至詠物則其拙尤甚故昨效諸公賦觀
音柳俗陋可笑今又聞有羅漢松可配前題再用

出醜蓋欲求刻畫無鹽變惡為美勿徒笑其醜云
十八羅漢十八公前身後身將無同一行九里西湖路
應供誰家去雪中

次韻答鄭元齡見贈

青年肥遯方求志白首貧交獨念予
開徑掃花童起早
敲門看竹客來踈
匣藏神物蛟龍劍
架插古文蝌蚪書
風雨一春門不出
門前車馬自紛如

宿僧房澹泊齋

鐘鳴雨樓風滿天金猊吐盡梅檀煙誰知林下一宿覺
我有石上三生緣

懷郡城諸親友

余生篤親友平居數相顧老去筋力疲此心尚如故年
年二三月晴暖入城府沂雩童冠俱所樂隨所遇安知
今年春十日九風雨甚疑蝸石漏無石可修補一榻高
堂氏四壁蝸篆古牀頭丹茵出青苔灑庭戶羣芳狼籍
盡來半紅半腐我耳未全聾聽之亦良苦賴有二三子

時復共樽俎或歌竹枝詞或賦梧桐句鏗鏘迭倡和所
樂勝鐘鼓歸舟掛晴帆快若馳馬去圓天磨青銅新淥
漲南浦候門童穉奔滄洲舞鷗鷺峩峩屋上山厯厯山
上樹白石喜不爛且無泥滓污不見黃初平散卧羊無
數尸坐對煙霞神交憶支許何時松葉酒薜蘿德星聚
瞻彼片雪闕援毫抒情愫

賀太平寺講主

生公坐擁點頭石野老來聽焦尾琴祇樹獨園春又夏

雜花千界古猶今
壁無畫水傳奇跡
塔有風鈴作妙音
安得刮除雙眼膜
時陪杖錫一登臨

感興

四月初九自城中抵家得
前四句後句日足成之

兩目眇昏耳又聾
僅存方寸古秦銅
忘機自得親鷗侶
舍弩從教伏射工
百越溪山詩枕上
四時風月酒杯中
惜春無奈春狼籍
頻遣蒼頭掃落紅

端午日懷古

五月五日追前賢
九歌九章鳴素絃
蛟人應泣魚腹葬

龍伯合贈龜毛羶招魂感舊痛梁壞反騷媚新圖瓦全
楚天盡處卧遊去艤舟酌月羅江邊

西塘詩為郭彞倫作

具區東北三千里家住西塘水之涘滄洲不泥軟紅塵
一鏡波光照牕几西塘本無風物奇有功於民民稱之
早田霑溉數百頃苗無槁死年無饑非湫非壑非瀚渤
不為蛟螭作窠窟輕舟往來快如馬撥棹人如執鞭卒
東鄰西舍雜漁樵朝出暮歸歌且謠白紅荷花紫菱芡

荏苒蘋蓼蒲蘆芟高齋讀書歲年久鍼經一編常在手
客來問疾或問竒拄杖挂錢舡載酒人人有此林塘幽
不妨未老先菟裘地因人勝從此始千古萬古芳名流

端午後雨阻過詹氏蘿屋即事賦絕句二首代
簡

風打舡頭輓不前舡回雨點大如拳請看六日蟾無用
且得爬沙手脚全

二

瀕溪數家風景幽溪流過門東轉頭黃梅雨少麥大熟
買布輸官不用憂

人面獸懲元惡也惡不可縱天不可欺故作二
詩以懲之

人面獸長七尺人衣冠人飲食面有七竅皆人形猛獸
之心人莫測生來害物固不少羣居猶自藏牙爪一朝
忽欲咬殺人豹麝文熊皆驚倒

二

人而獸聽吾語一人受害一家苦爺孃妻子令失所殘忍
胡為至如許人言汝性多陰毒中汝毒者悅汝目快汝
腹汝心方饜足嗚呼馮婦或再生獸乎獸乎勿橫行恢
恢天網布八紘莫道網疎可漏天聾盲

追悼諸葛用中

諱端幼年能寫大字既習舉子業學琴袁子方先生之傳父號

德齋晚學道

創清微觀

揚子江南疇曩日呂蒙城裏一文星科場早試程朱易
玄學旁叅道德經愚與通家心甚赤賢能知己眼常青

草生書帶人皆喜竹作詩筒使不停著處溪山朝載酒
有時雪月夜揚舲卜鄰晚欲從王翰分席尤加敬管寧
一旦谷陵驚變改十年兵火苦飄零扣門幾誤風敲竹
泛宅長如雨打萍天上玉樓俄有召月宮娥藥竟無靈
細君冠佩全貞節先世箕裘祝寧馨名溢東吳滄海國
魂歸北固白雲屏兩家相去百餘里一老今踰九十齡
聯句每懷吟石鼎聽琴頻夢坐柯亭柱題應有能言鶴
擬踏秋風去一聽

寄鄧秉文二首

曹橫山下聲叟呂蒙城中放翁何夕舉杯邀月中秋鼓
柁乘風

二

鐵柱砵斨二老瓊霄沆瀣三更絕口不談時事掀髯聯
敘平生

寄陳彰遠明遠兄弟

金牛臺下帶經鉏長鋏無聲食有魚兄弟五人雙壁在

箕裘三世一廛居中秋明月最端正長夜浮雲或卷舒
覓得丹梯上天去同將物理問何如

寄辛至善

青年即著遠遊鞭白首仍居小市廛寂寞蓬蒿三徑在
辛勤父子一經傳奔牛堰下水到海射虎亭西山挿天
我欲抱琴尋戴去中秋相近月將圓

寄清微觀周泉石

塵揚滄海廿餘齡真館翬飛壓凌亭風掃劫灰南土樂

天開圖畫北山青
丹砂九轉龍蟠鼎
玉漏三更鶴聽經
諸葛仙翁呼不起
正須金石播遺馨

三笑圖

簡寂先生五柳翁
襟期適與遠師同
過橋相送忘相別
千古風流一笑中

風雲雷雨畫四首

吹噓萬物生
濛濛益益元氣索
齋吁偃禾拔木有未會
請君細讀金滕書

二

漠漠閑雲淡淡容不為蒼狗未從龍直須霖雨成功後
依舊還山伴赤松

三

金電光中霹靂飛殘臣膽落震驚時雲收雨散青天出
能聽無聲有阿誰

四

誰挽銀河沃太空恩霑赤地洗熾熾陰陰變理天家喜

都在丹青筆意中

野雲歌為王元一羽士作

山中之雲斂蹤跡空谷深藏伴泉石從龍之雲雷電俱
四方行雨勞馳驅飄然一片雲在野看來最是悠悠者
或舒或卷無朝夕南北東西隨所適道人含笑松下坐
我即是雲雲即我

買臣讀書圖

噫予會稽守素行何卓絕采樵工或餘誦讀聲不輟青

柴擔頭春赤脚林下雪富貴知有時妻子從改節高風
一如此後世誰可埒吾將訪遺蹤更得探禹穴

薦福寺紅梅詩

紅梅閣事見毘陵志等書庚溪詩話載程致道詩
有春風日浩蕩醉色回冰肌之句元末兵燬今本

山釋源公竺淵恢復舊刹重植茲花丐予詩記之
紅梅閣下梅花樹陵谷變時風拔去堯峰老禪歸故山
覓得孤根栽舊處年年春到花時節一株五出胭脂雪

春風笑面歲寒心
光霽混融風韻別
老禪道服忘妍醜
品題假我扶犁手
黃州定慧海棠花
可與齊名傳不朽
月香水影象王宮
雜花世界將無同
幾度拈花有人笑
吾將請問瞿曇翁

源竺淵以道西傳等和予詩亦蒙見贈且云臨
字等韻難和予由是復次韻酬之

支許論交世所欽
昌黎亦聽穎師琴
深山大澤多遺逸
明月清風無古今
閣下梅花桃杏色
庭前柏樹海潮音

寫容代有丹青筆電目誰能一照臨

獨孤公檜詩

唐獨孤憲公為常州刺史時有手植之檜今見諸
郡志等書元末樹毀於兵至二十餘年為州民者
宜再植以寓思賢之意况有周鍊師為松菊主者
乎率爾口占呈乞諸搢紳先生更唱迭和相與翫
成亦庶乎厚風俗云

憶年十五六好古尊前賢初聞獨孤檜快靚曾爭先蒼

然一株枿舊根皴皮錯節枝葉蕃適逢夜雨半身濕疑
是往年甘露痕孔明廟前柏相似乃在陳司徒廟之後
園鄉來陵谷忽變改化作劫灰飛入海神焦鬼爛救不
得桐鄉自此無光彩幸存一曲闌干石題公姓氏留遺
跡石苔爛斑土花碧相伴銅駝卧荆棘余從海上避兵
歸幾度摩挲長太息懷哉古之人好賢意無窮詠甘棠
愛召伯賦菉竹美武公憲公此樹堪比隆後人寧不仰
高風玄都道士桃千樹一檜區區豈難措龍鍾野老及

羣英亦愧因循坐遲暮檜乎檜乎重培植風枝相膠霜
幹直邦人具瞻仰遺德見樹猶如見顏色六百二十五
年如一日

題牽牛圖

為丁學古作

不放桃林不飲池

叶唐何切

牧兒牽去意如何南山石爛今

非昔甯戚無勞扣角歌

題鷺鷥便面

為丁學古作

潦倒滄洲客蕭騷白鷺詩牧之呼不起此意少人知

出門

老去多懷舊興來時坐馳出門窮鬼笑罄室故人知野
飯新菰米詩囊古竹枝諸孫溪上別矻矻問歸期

題僧綱澹泊軒

我愛澹泊軒山居城市中雲分半間許雨溜四壁同風
林金石聲道人冰雪容澹然味無味泊然空不空露坐
點頭石雪立摩頂松吾徒幸相與吾道喜不窮一笑兩
忘言落花舞回風

江山漁樂圖

數口妻兒網一張船為家舍水為鄉江南江北山如畫
欸乃聲中送夕陽

崑山王有恒以書附常州天寧寺長老寶公問
予近况作詩答之并索諸友賦重植獨孤檜詩
客從笠澤來常郡書到橫山問老夫哭子哭孫家已破
賣書賣劍酒還沽千墩每入龜巢夢十月應開獸炭爐
支許舊遊煩寄語肯題唐檜和巴歛

黃林屋許贈皂布巾不至戲作此索之

霜倒蓮葉巢老龜寒縮首欲裹緇布巾并裹瓦盆酒此
酒今已熟此巾曾製否抱膝梁父吟炙背坐南牖老况
知音誰橫林隱居叟

贈天寧寶滄海

臨濟雲仍幾代孫猊牀說法象龍奔庭前銀杏西來意
陌上銅駝東郭門四海共霑新雨露一舟能泝古淵源
留衣人遠衣何在別有加黎遺後昆

悼城西周彥美二首

七十六年事梨花夢裏春家傳三代禮身作兩朝人負

郭田園樂連雲第宅新

闕

麒麟

二

三槐堂上客

闕

最青春吐酒常憐我奕棋多勝人

闕

竟作白頭新醜酒橋玄墓潛然為泣麟

寄饒州鄱陽縣唐生

千七百里鄱陽縣外孫書來如見面九十三歲龜巢翁

中宵夢得重縫線詩瓢山人來上游吾將結社招馴鷗
延陵昔日繼三讓野水何處無孤舟貧家幸爾年穀熟
買書教兒耕且讀梅花無恙竹平安歲晚無勞念窮谷

和舒文允見貽

冬至經旬久朋來喜踐長市沽雙木榼踞坐一藜牀小
酌成歡洽閑愁付杳茫山無白石爛谷有紫芝香澹泊
聊相與辛酸已備嘗盡消湖海氣莫放斗牛光所貴心
能直何慚貌不颺聽冰狐自惑吠雪犬何狂歲晚鷗盟

在生平蟻夢忘酒堪澆磊塊袖莫舞郎當西崦黃茅嶺
東洲白水鄉漁樵同此樂吹笛送斜陽

夏五訪一舟禪師臨別立銀杏陰中謂予曰山
中舊物什喪八九唯此木幸無恙也宜蒙品題
為天寧勝槩使居山者亦預有餘光余謝不敏
然心嘗許之故茲口占以頌人物具并之美

一箇虛舟渾不繫千鈞重負力能任金園地湧靈光殿
銀杏天生雙樹林佛印衲裙坡老帶昌黎詩句穎師琴

禪林勝事無今古况爾庭前好綠陰

輓曹子毅大使

早歲輕肥試米榮一官三載繫塵纓解龜便作幽棲計
瓜圃東門學邵平

二

桂子初生折嬾枝青瓊舊物遂陵夷竹林小阮親調餽
何異慈烏返哺兒

三

生來不鑿混沌竅此去竟作逍遙遊回頭一笑看鷓蚌
未到釜鬻誰肯休

洞庭胡敬之以予父執之交歲饋新橘凡十有
餘年感無以報是用作歌

湖山清氣鍾而翁生兒亦有古人風年年送橘拜牀下
甚愧我非龐德公今年霜落洞庭早橘熟等於葑田稻
青衣童子黃金丸樹頭摘來霜未乾儂家食指百三十
分甘喜得皆波及嬌癡堪笑兩曾孫手弄金丸口欲吞

阿翁老饕三嚙畢教孫食之還自喫一枚一枚復一枚
翁有笑聲孫亦哈枯腸久似長卿渴甘露適從仙掌來
楚江萍實不可得華峰藕亦無人識冷比雪霜甘比蜜
此句真堪題此橘韓子之詩今代無借作報章揮我筆
懷哉故人家洞庭七十二峰環翠屏洛陽秋風塵滿城
莫能污爾雙鞋青山不爛黃河清正須坐閱三千齒
山中舊識諸耆英莫煩老夫多寄聲

紅梅

前代支郎亦異哉
白雲堆裏植紅梅
樹經劫火多番換
花向春風二月開
鄰舍杏桃渾赧色
禪枝草木絕纖埃
一時想像題詩去
別日尋芳載酒來

歲旦言懷

去年元日兩眉攢
情抱今朝頗覺寬
一夜雨聲曾不絕
五更天氣只微寒

二

曾孫杯捧屠蘇酒
冢婦厨供粬粿盤
最喜催租人不到

田家雞犬得平安

寄盧長嬰次農

我思東吳諸故人二難青年才出羣炯炯眼如巖下電
英英氣作山中雲一經旨趣熟儀禮六書偏旁宗說文
無由縮地即相見晉鄙亦得沾餘薰

寄辛彬甫

五鳳添修助益箋雙魚書尺竟虛傳桃符忽爾三年換
木榻如今兩膝穿南國鶯花春甚早東洲雞黍約如前

好來同賞元宵月莫返山陰訪戴船

和毛伯尚雪中登塔

一夜雪深三尺許江南江北久無之躋攀鴈塔最高處
想像鴻荒未判時光動山林搖玉樹氣涵湖海湛瑤池
僧房或擬天花雨田舍皆占隴麥宜黃竹無歌良可喜
清河有頌不妨遲八千里外多遭貶十二街中欲訪誰
白戰正須逢敵手長吟聊復解人頤凭欄細聽風鈴語
似亦知音說好詩

壽諸葛節婦

憶昔梁鴻歌五噫挈家避兵東海涯玉樓有夢上天去
孟光無復案齊眉旌旗滿眼愁滿腹抱兒日夜吞聲哭
沙湖岼竹似湘江淚痕斑盡依依菜呼天顛地吐丹衷
柏舟之誓共姜同桑田變海得歸路慶亭故園榛棘中
教兒服勤能構獲青氈舊物兒堪託星冠霞佩蓋珠經
萱草堂前樂吾樂春秋六十有八年時人喚作女中仙
麻姑送酒作生日雙成獻桃紅且鮮高堂長夜照明月

何異嫦娥廣寒闕不勞白兔搗玄霜真修自有長生訣
仙家歲月我不知我來為作節婦詩他年烈婦傳中寫
千古萬古芳名垂

獨孤公檜詩

并序

予前詩謂獨孤公檜在陳廟蓋圖經所載及予親
身見之一日郡人徐孟曾問曰唐刺史為一州之
主手植之檜宜擇美地公表而出之衆所共瞻何
寘諸陳廟之後耶予曰按唐書德宗朝徙公為是

州刺史去梁公毀江南淫祀之日未久無陳廟也
唐衰禮廢淫祀寢興迨五季而禮法大壞叢祠之
神類加尊號陳廟或肇於唐末而盛於斯時今荒
園廢沼安知非昔日驛亭傳舍乎歷宋而元皆無
改作故翁卷之詩有曰托根陳帝廟應不慮樵夫
其意不以此木為不幸而反以為幸也可勝歎哉
孟曾然余言遂植檜舊所予亦恐前詩為人口實
因復作是詩

獨孤之檜化鳥有庶士重栽倚碧尋遺德一州人眷眷
流芳千載樹陰陰霜根蟠入龍蛇窟風葉響成鸞鳳吟
願若甘棠無翦伐報公疇昔愛民心

寄聰上人嘗託補楞伽經脫簡就用索之

杖杜之歌落九天石尤風轉送歸船長洲茂苑渾無恙
翠竹黃花總是禪眼孔不教迷土苴耳根常得洗風泉
貝多葉上楞伽語脫落應能為補全

題顧師道樓居晴空圖

山屨顏雪爛斑飛樓縹緲層城巔水晶榭題白玉闌樓
居之人應列仙金烏出海飛上天藍田瑤草煖生煙誰
家馬上郎意態清且閑既非謫官遇雪阻藍關又非春
風得意遊長安摩挲老眼仔細看乃在櫟里先生圖畫
間

碧桃贈呂城壩官應孟恭

猗猗谷中蘭鬱鬱澗底松我愛之二物幽尋處亭東路
逢碧桃花澹然無冶容吾知所笑者羣芳鬪青紅本來

天上種有此林下風

老況

哭子三年孫兩年一孫戎服又西川秋風茅卷藏書屋
春雨苔荒負郭田堪笑平居能獲落誰知末路竟迤邐
空林樹折烏巢毀奈爾孤雛失所天

雨中期辛彬甫不至兼憶兒子林孫塏等一時
口占二絕句

雪尋戴逵興不遠雨過蘇端意甚濃若使兩賢生並世

浣花溪上我遊從

二

一雨能生五月寒
三杯欲釋兩眉攢
那知酒入愁腸去
化作潸然淚不乾

謝饒州周氏甥孫女惠鞵

昔領軍一屋之鞵未聞有惠人者
今唐伯亨室人製雙鞵遺我於一千八百里之外
其親愛之心可謂篤矣
然則苟非伯亨之真其室中之人
安能遂體

其心哉區區報章豈忘所自故著其說如此詩曰
濯足洮湖寂寞濱寄來雙屨藕絲新何當化作飛鳧去
謝汝慙勤念老親

贈盧長嬰次農

憶昔盧兗州生有古人風病世禮俗壞或與禽犢同遺
經授子姪世業今專攻騎箕去不返象賢躡狐踪平居
迭師友砥礪相磨礱東海雙南金豐城兩神龍含光若
暗投天將振儒宗叔孫自綿叢制作成治功潛心對黃

卷儼然見周公妙理折秋毫百世開羣蒙追攀大小戴
旁叅鄭司農復看書帶草匝地生婁東顯親垂令名永
言報而翁

寄南宗僧綱

大空寥寥雲自浮驕陽蟲蟲金欲流白生一室靜如水
清坐六月涼於秋陽美好茶留客共獨孤多檜賦詩不
官樣文章祖蒲室正須述作贊皇猷

寄一舟禪師

葱葱雙樹林井井百丈規
欽欽響鐘鼓棣棣慎威儀
空庭苾芻草淨瓶楊柳枝
滿眼皆祖意此身丁盛時
熱客不相過清風堪自怡
或翦葛藤話竟織駢儷
詞陵谷變未久山水知音
希我本六日蟾眎同五總
龜儒墨各有趨支許交忘
機眷言獨孤檜曾覓一二
詩禪縛想自急詩筒來乃
遲南風非不競北山何用
移請拈木毬子聊作逢場
嬉

寄講主法師西傳

懷哉久別廬山遠，奈此相望去路賒。
屢夢丹梯同上塔，每留清話竟忘家。
芭蕉手種繡經葉，菡萏池開結社花。
三伏不嫌人襪襪，一肩偏袒佛袈裟。
竺書自早探三藏，緹帙如今載五車。
方寸靜涵滄海月，文章光炫赤城霞。
尚憐老馬能知道，更喜神羊解觸邪。
早晚蓉湖秋水碧，定期濯足過漚沙。

懷詹伯遠

蝌蚪殘書補未全，齋居一榻坐來穿。
稻花遶屋白如雪。

溪水出湖青接天冠蓋不來騎馬客鷗鳧長傍釣魚船
多時欲問平安信伏日題詩寄竹邊

寄贈岳陳齋二首

一書曾寄訪行窩百里相望阻渴波陽羨谿山無恙否
延陵風俗變來多鷓鴣夜集連雲厦荆棘叢生注馬坡
尊酒欲懷千古意中秋蘿屋候經過

二

南山爛石無多在東海颶塵又甘霜奇字盛傳揚子學

德門誰表鄭公鄉
秋高丹桂花纔發
閨後黃楊樹必長
會有龍蛇生大澤
流芳竹帛繼先王

寄薦福寺源竹淵

青門薦福東堂老
白首默誦西方經
有時適興倚梅閣
無復談禪坐拍庭
解夏欲隨雲水散
立秋忍聞風葉零
老禪心性一如此
說頂會有伽耶鈴

寄贈呂城羽士周泉石

仙風飄飄天骨奇
不睹爾髮黃爾看
海上鐵船渡九折

道傍

關

金狄知松花釀酒常留客竹籜裁冠自賦詩

不解腰纏要騎鶴道人應笑俗兒癡

索居無聊自七月既望至中秋前九日腹稿得
小詩十首不追琢不詮次大率皆眼前事無遠
興也然胸中芥蒂有消釋未盡者或見於詞可
笑

我愛青山爽氣增青山似我骨稜稜半年不踏山前路
也學禪居結夏僧

二

一昨病暍思清秋秋來兩旬熱未休堪笑荒唐野人語
天公不遣火西流

三

詩腸頗饜木雞肥老齒方便豆粥稀今雨客來如舊雨
多情只有兩烏衣

四

蚊蠅屏跡去何遲烏兔循環度不移一雨夜來涼可喜

家家水滿養魚池

五

十里山開翡翠屏
三家村裏老人星
無塵竹徑風還掃
徒壁茅齋夜不扃

六

魚自浮沉水自流
釣船閑繫小溪頭
朝來賴有杯中物
忘却連年日夜憂

七

阿翁眠食龜頭舍兒子耕耘犢鼻視記得孝經刊誤本
尚能口授教曾孫

八

牀頭鬪蟻取人憎壁上粘蝸失自懲螢火光殘小兒手
誰憐堪作照書燈

九

涼風騷騷草木黃初月皎皎更漏長洛陽有夢忽驚覺
鶴唳聲中人斷腸

十

稻花雨外紛如雪
桂子風高香滿天
誰信一雙多病眼
餘生重見太平年

暨陽沈德隣氏徙居郡城名燕處之室曰咬菜
根處昭其儉也龜巢老人謝蘭謂之曰夫人以
儉德立身惟窮達不變者君子韙之拙詩效顰亦
曰備薑桂之用云

士方窮居含糗茹草誰無菜根知味者少
睠茲小物大

道可擬淡而不厭斯為君子鮭菜自珍龍根自奇我菜
之根朝斯夕斯若決濡肉或如啣骨左車有聲宮商仿
彿賢相脫粟聖相齧匏顧予何人口腹敢饗吾愛吾廬
畦蔬遶屋盤有餘飧鼎無覆餗窮達百年始終一趣明
月清風咬菜根處

輓管伯齡

先生多才德與俱崑山之玉滄海珠玉華忽作白雲散
珠光竟隨清夜徂青青書帶匝里閑纍纍筆冢埋荒蕪

雞林客來嘆且泣欲覓好詩還有無

二

憶昔狼煙兩袖黃斷蓬飄泊鄭公鄉金龜換酒邀明月
玉麈論詩說盛唐百年往事陵谷變通家交情江海長
騎箕先著祖鞭去旦夕吾將與頡頏

陳存心先生挽辭

代黃仲器作

蒲石軒中山澤耀出門戎馬即長驅欲騎東海金鰲去
竟作西風玉樹枯化鶴還家人想像義烏銜土子號呼

恨無杜老揮椽筆寫入哀詩比畫圖

鶴鶉圖

不作巢居與穴居
鳶飛魚躍不相於
平坡淺草幽閒處
宿食飛鳴得自如

題清微觀

并序

蘭嘗考慶亭乃孫仲謀射虎之地今為呂城橋密
邇清微是為清微勝槩也不揣言耄表而出之并
為燕廈之賀云

阿蒙之城何代傾
立元闕宮無與京
英雄射虎陳迹在
咫尺奔牛古堰橫
鯉魚飛去石盡爛
桃花種來蹊自成
華陽福地一如此
何用山中宰相名

懷袁耕學諸故人

夢裏忘余兩目盲
馬鞍山下訪羣英
詩容總似山容瘦
道氣多如海氣清
皎皎白駒方屏跡
嚶嚶黃鳥未忘情
呼兒早起題書尺
十日新年雪乍晴

右寄袁耕學

二

憶昨吳淞十二詩
清真道士獨委蛇
梨花春釀適來熟
頻遣青衣送酒資

右寄清真觀道士俞

三

鉏斧單提不暫停
黃花翠竹總忘形
問渠送米盧仝意
也愛茶聲有可聽

右寄延福菴主

四

雲峰毬子逢場戲一笑春風舞袖歸從此晏然門不出
忍看沙界有危機

右寄僧闕長老

五

崑山絕頂立浮屠海闊天高氣勢孤莫道八風吹不動
八風吹動有人扶

右寄僧勝上人

六

玉峰巨邑冠東吳在處金園似給孤手把竺書朝夜讀
此心能轉法華無

右寄僧善性空

送郁友文之京

揚子江頭春二月送客登舟赴天闕男兒生有四方志
莫作尋常默然別憶昔孺子歌滄浪尼山聖人曾激揚
我賡再歌呼索郎子其洗心宜勿忘

次韻奉荅瓢齋先生見寄二首

齋居一榻坐來穿腹笥羣經老欲眠夢裏亦行端正路
醉中常造渾涵天春光荏苒無多日天氣霹靂近禁煙
舊雨不來今有約虹光遙望載書船

二

予家經亂離蕭條無六親遙憐竹林阮中有白首人高
詞吐白雪逸氣凌青雲梗柵豫章下灌木無足云安知
射工弩中厥父子身問疾數往返先生同五倫奈何日

月下覆盆茹艱辛惟天降炎霜清颺灑冠巾一朝禍根
拔戢穀乃薦臻孤鶴還九臯飄然離雞羣吾將問玄機
載酒歌子雲

僧綱贊公和尚以疾得告而歸善權舊隱橫山
老樵謝蘭效劉賓客竹枝二首為臨別贈

維摩牀上遣文移治績垂成竟解龜僧史有如班馬筆
絕勝州里去思碑

二

滷浦飛花送客行
善權耆舊出山迎
問渠那得真消息
摩頂松枝喜鵲聲

過無錫醫士徐士廉別墅

棲神山在屋西頭
竇有寒泉帶錫流
山近杏林煙樹接
泉香茶鼎雪花浮
蜚英早歲肱三折
樂道清時號四休
堪笑興來忘潦倒
尚能攜酒過滄洲

寄楊彥澤

逢人屢問平安信
有子亦如郎罷賢
萬石朦朧輸賦足

九重閭闔奏名先未論烏鳥能含哺且喜黃楊閱閏年
我昔與談忠孝事阿戎詞色兩忻然

次韻送秦文仲歸海上

溧水先生挽不留故山回首鬱相繆落花飛送九年客
行李歸來一葉舟勲業鏡中成白首耆英會上冠清流
獨憐詩社今寥落無復尋盟集舊鷗

送秦文仲教諭歸老崑山縣

盛代垂新統斯文續斷絃青山溧陽縣白首廣文壇唾

視鉛刀鈍心持鐵硯堅蓬麻扶盡直茅茹拔相連頌印
恩殊重明倫教欲專諸生皆鼓篋三物屢興賢美績經
三考英聲徹九天晚成真大器幽谷必關

命以菟裘老

榮於書錦還黃河清有日白石爛多年齒德身兼備文
章世自傳本來天下士且作地行仙鷗社詩盟在鱸魚
斫鱠鮮寄聲袁處士雙壁喜俱全

次韻寄薦福寺東堂長老

坐斷根塵知幾年
逢人猶說未生前
有時觸背都忘却
笑指扶桑尺五天

二

家山不見舊忘年
重植紅梅慰目前
樓閣大開彈指頃
香風應到率陀天

三

莫笑黃楊老閨年
枝枝葉葉不如前
姓名留在香山社
也愛吟詩似樂天

橫山白龍祠

神母何年生白龍曹橫一墓遶龍宮蜿蜒靈物望如在
寂寞古井清若空山川每見出雲氣鄉里競傳行雨功
府縣官曹走籩豆質我識字田家翁

簡沈時敏二首

往予入城府筇杖扶蹕蹠故舊驚骨立兒童嗤貌寢時
予適見蔑為我言責沈心持一寸鐵詞吐五色錦所喜
得三益豈料別數稔嗣音竟茫然屏跡疑遠甚近從支

道遊因聞許詢吟家住洛陽橋窗含瀟湖浸煙波隔紅
塵雲樹幕清蔭安得忘年交時能邀月飲文章論大雅
酣適就高枕人生貴佚樂此樂真絕品

二

憶昨觀李杜詞場車並馳追蹤三百篇齊名盛唐時杜
詩多與李李與杜者希當時豈偶然意或有隱微復觀
杜憶李首陳褒美辭其間方鮑庾微意若少之樽酒欲
細論諒非談笑嬉迄今千載下疇能發玄機區區蠹測

海敢告新相知秋高金氣清桂子香風吹虹光書畫船
雞黍或可期合歡杯勺間評此兩白翁况有古經史相
傳更多疑朝聞夕長逝九京含笑歸

憂旱吟

吾聞東海殺一孝婦三年乾天人感通非浪言又聞長
平坑卒四十萬胡為乎竟舍梅人讀書貴主窮理斯理
未明堪汗顏竭來一旱月幾圓老農多憂良可憐青苗蟲
生食欲盡赤地龜坼生炎煙龍祠巫祝杯玳擲羽士醮

壇鐘磬喧妻孥踏車或抱餒牛犢賣來供社錢盲翁夜
來亦不眠追思直從三代前堯湯水旱皆數年必能有
以扶顛連當今聖明君咫尺九重天有能鳴哀玉陛前
天恩不日彌九川一夫罔令溝壑填耕田鑿井仍熙然

示冢子及孫

曹橫山下小菟裘某水某邱堪釣遊四世團樂非易得
一窩安樂比前修家庭惡有司晨牝江海憐無結社鷗
我子我孫宜克念莫將肝膽作仇讐

又自述同示

搢搢劬書覲有成區區沒世恥無名七情欲斷氣未斷
兩目欲盲心未盲白練製裙蠅點污青燈照榻鼠縱橫
家聲掃地綱常在未許兒曹學倒行

祭禰忌日詩

投老龍鍾日思親長養時羣咻憎陋俗四遠擇名師夢
有生花筆才非脫穎錐庭闈歸定省翰墨作遊嬉隣舍
三元日桃符七字詩柏臺驄馬過茅拔鷄書馳氣色生

逢掖光華照庶彛亨衢雖不到大道頗能知黷舍種分
坐儒冠廩稍糜中年逢世變濱海避時危骨肉能相保
肝腸罔有私尚蒙先子澤不受外人欺粟里歸來廢橫
山卜築遲頽然窮谷叟援乃落巢兒子愛非姑息孫謀
有厥貽牝雞良可惡烏養本相宜昔怨何三失今逢此
百罹雙親應念我鑒此蓼莪悲

雲林書舍

為徐益容作

東家領軍鞋一屋西家買妓傾珠玉寂寞南州高士孫

燈火小牕書夜讀義皇畫卦龍負圖蝌蚪此時無簡牘
神農本草軒岐語為是傳家先爛熟唐虞三代二千載
六經聖賢常在目牙籤挿架日益多蕋境漸佳心未足
便便腹笥貯琅玕齒頰霏霏吐珠玉鍾期骨冷呼不醒
誰復賞音聽此曲青林不著軟紅塵祇許白雲簷下宿
雲乎雲乎知不知封胡羯末森如竹白眉之良衆所稱
能繩祖父棲幽谷清河有頌泰階平應著先鞭駕黃鵠

賀潤天澤住持保寧寺

橫林之北橫山西孤村流水古招提青苔一徑童不掃
白雲半間人共棲松枝甘露落麈尾桂子香風吹麝臍
我來欲問點頭石道價孰與生公齊

南宗僧綱和尚唐允明吟友倡和見贈

支許久不作緇林景清德適見雙南金褒嘉詎容默新
詩倡且和字字皆悃悞挹此沆瀣秋注茲雲夢臆大道
本平平中庭宜殖殖九品蓮花臺毋庸論西域

豆腐詩 并序

凡人年老者以肉養之古今一致然老而無齒則肉林之盛禁臠之供其如朶頤何求其甘輒若豆腐者真可謂養老之善物也但名物不著乎六籍品第不列於八珍鐘鼎之家咸藐視之比予過僧房學舍連得食其佳者嘆賞不足發於咏歌是猶為冰壺先生作傳也博物君子宜蒙品題吾言固無足取重於人庶不為嚇腐鼠於鷓鴣者耳

誰授淮南玉食方南山種玉選青黃工夫磨轉天機熟

粗滓囊傾雪汁香軟比牛酥便老齒甜於蜂蜜潤枯腸
當年柱史如知味飲乳何須窈窕娘

唐允明以吾孫垣自成都府巖洲衛公差過常
鎮等府因得覲省賦詩見貽有情兼悲喜之句
可為知我者矣次韻示垣并謝允明

數千里外公家事七八月間行李歸搖尾門迎一黃耳
傷心客散兩烏衣穿揚自可成勲業擢桂從他赴禮闈
多謝故人能警策好鵠肝膽莫相違

袁耕學先生以陶詩集句十五首見示心賞不足
足以辭荅之

先生山澤臞遊戲詞翰中生來愛陶詩白首情所鍾
集句成大章一氣春融融纍纍九曲珠螳絲中貫通嗟予
目無見擊節歌玲瓏竊比蔡中郎以聲識焦桐即物因
有感懷賢仰高風孤竹首陽餓五柳柴桑窮窮非餓死
比方寸將無同史稱晉徵士直哉考亭翁風俗今變改
草木豈亦從黃花朱紫貴青松大夫封邪蒿匝地生指

佞草絕蹤何當過橫山班荆坐孤峰先生口懸河洗我
蒂芥胸風帆早乘興我耳猶未聾

弔薦福竺淵源公

滄海塵生罷遠遊紅梅手植繼前修雲開樓閣人彈指
風振簷鈴我掉頭十萬里程天竺國一乘車駕雪山牛
客來舊日喫茶處煙冷薰爐憶趙州

寄南京僧綱并寄唐允明

雪竹霜葩歲晚時袈裟逢掖往來嬉著書應笑龜巢老

刻畫無鹽醜不知

二

詩滿簞瓢酒滿船時人喚作地行仙
抽絲適有冰蠶繭好為焦桐續斷絃

東洲觀音堂琵琶歌

七佛之師觀世音十方化身無古今
補陀金刹南海現無價寶珠龍女獻
東洲築堂五六春茅茨乃作有漏因
珠冠白衣漬泥潦龍王女兒應笑倒
豈無巧者善安排

不堪空打赤白崖鴛鴦瓦合數千百圓通大士居安宅
衆毛集來成一裘震風凌雨更無憂青銅錢與珍珠粟
今生布施來生福

松竹梅三詠

歲寒松柏冠山林論語垂名照古今韋偃畢宏俱即世
傳神賴有草堂吟

二

淇簞猗猗比武公清風本與首陽同六經煙滅秦坑後

嘉爾雲初紀載功

三

吳王醉處十餘里
僅得晚唐人一詩
不遇西湖林處士
暗香疎影有誰知

寄習訥二講主

南山北山兩浮圖
東家西家皆給孤
塵世換來風景別
上堂鐘鼓似前無

寄辛彬甫

長短句分三四派聖賢經訓數千年
唔咿聲裏工夫熟
萬象森羅月滿天

寄性空山主次韻

住菴家法似南泉
鋤斧單提十五年
歲晚閉門渾不出
忍看霜倒佛池蓮

寄呂克明

生不封侯向酒泉
筆耕東郭太平年
林居適與僧廬近
也為招賢種白蓮

二

客來曾得問林泉
書帶青青倍昔年
且喜時人多未識
楚江萍實華峰蓮

次韻自述

兩目塵昏淚迸泉
春秋虛度伏生年
滄江歲晚龜藏穴
依舊巢居一葉蓮

二

雪水煎茶勝惠泉
茶經重著兩三年
夜來明月梅花下

又擬濂溪說愛蓮

感懷

生來迂闊從人笑老去盲聾祇自憐
紅藥殿春能幾日黃楊厄閏又三年
簷風卷我蚬蠅幔夜月窺人蟻蝨羶
江夏黃童能扇枕當時太史豈虛傳

短歌行

東謝莊西謝莊
奔牛東斗十里強
先人痛惜家譜亡
能言其畧忘其詳
高曾本住開封府
紹興之先離亂苦
隨

龍渡江寓茲土以謝名莊似韋杜後來一派分烈塘華
屋高邱乃吾祖季父咸淳中甲科封胡羯末皆簪組宋
厯已矣元厯新竟作遺珠沉合浦我祖佳城宰木拱家
庭玉樹遭斤斧我祖我伯我父兄青塚累累續遷祔轉
頭滄海又揚塵十年逃難歸洪武昏鴉滿樹雀無枝結
巢乃在橫山塢三子六孫中子殂長孫又殂黔陽簿黃
茅嶺畔作哀邱昭穆按圖無抵牾年年寒食春草長橫
山烈塘連謝莊一盂麥飯一壺酒老淚觸處俱淋浪於

乎豺獮猶能效烝嘗何況人為物靈知義方我今諄諄
語兩郎爾子爾孫宜勿忘

冬至前一日寫懷二首

龍鍾去年冬修書辨魚魯吾兒念吾衰勸我勿自苦吾
嘗責吾兒曾讀孝經否聖人教斯民揚名顯父母窮達
固有命劬勞何敢負芟夷兔園冊於道或小補方誦蓼
莪篇安知又初度存順沒吾寧全歸冀朝暮

今年盲且聾狀若霜木槁齒牙脫兩齧涕淚出四竅獨
存方寸鐵自謂無價寶異端屢排斥淫祀絕祈禱喋喋
非好辨惓惓衛吾道一陽葭欲飛九土荔將出家人忽
起早為我作生日沽酒斗八升有菜二十七北風非不
寒南簷盎如春都置眼前事且漉頭上巾巢居烏返哺
拄扶鳩祝噎橫山薺瓮水東洲釣船月窮鬼莫見笑老
夫堪為悅寄語撲燈蛾少須燈自滅

寄朱季明

客來曾說問詩臞西郭梅花玉一株朝日尋常照首宿
春風次第到屠蘇通潮港淺潮田熟捍海城高海寇無
珍重歲寒門不出催租吏卒競喧呼

寄題讀易齋

為辛彬甫作

讀盡諸家卜筮書義經日夜卷還舒數椽茅屋聳江上
一樹梅花臘月初童子研朱頻滴露客來買卦或潛虛
珠璣咳唾琅玕腹何患家無擔石儲

王達善母挽詞

阿母穆穆林下風生兒彷彿晉阿戎起家讀書眼如電
闕閱衣冠俱一變三從無違四德全月旦有評無間然
萱花堂上安且吉分甘抱孫長在膝風含夏葛并刀剪
雪霑寒笋充厨饌兒能苦學夜不眠不勞母作熊膽丸
客來治具兒不乏母勞母剪青絲髮升堂拜母環珮鏘
慈顏怡愉春滿堂希年厚福有如此千萬人中能有幾
兵餘重見太平時盖棺應喜得全歸諄諄有命提兒耳
不以浮屠廢喪禮素車白馬紛如雪閭里光輝人共說

我歌薤露聊云云宜有張林之碑傳後人

塗謠

新年騎竹走兒童兩月甘棠憩召公大誥奉揚天子命
崇文絕與昔賢同閭閻四邑歌謠喜囹圄羣繆剖決空
魯泮芹香霑教雨孔壇花暖鼓春風投膠澄水真難事
覆篲為山必奏功早晚璽書嘉政績東關劍井氣如虹

和王有恒野步

芳草青青路欲迷白頭有客共扶藜吳田半沒桃花水

辜負春風布穀啼

二

雨雨風風一夜春
惜花愁殺少年人
青山不管人閑事
也學吳姬翠黛顰

和王有恒見贈

客來欲與問天翁
鳧鶴奚為脰不同
一代衣冠更變後
五湖風月笑談中
脫巾醜酒留知己
擊節哦詩和送窮
窗下小桃嬌欲語
錯教童子喚紅紅

糟邱作為鮑思文作

諸公搢搢營菟裘何如將老吾糟邱杯餘酣睡儘落魄
堂上肉食從伊優酒泉不作二千石醉鄉宜封萬戶侯
幕天席地燭明月日與麴生同宴遊

攬翠軒

昔人車載蒲萄酒區區為覓西涼守山川信美得專城
能有幾時權在手何如白駒在空谷四山空翠皆吾有
非煙非霧非塵氛鬱鬱葱葱藹林藪兩間清氣相混融

若有人斟西柄斗繫我南州高士孫說項求詩半年久
老夫平生愛蕭爽一笑相逢敢多口山靈望子早歸來
相伴雲林猿鶴友朝餐青霞夕沉澗攬翠軒中可兼取
何異商時茹芝叟

王有恒以詩留別其詩有鶯花催老淚之句予
乃效唐人和意而不和韻送其行解其悲兼簡
吳中行心友

丈夫不灑離別淚杯酒堪澆磊塊胸勛業連年雙鬢雪

歸舟此日一帆風身居畎畝宜為樂腹有詩書未是窮
寄語雲間吳處士好將安信慰盲翁

苕溪獨釣圖

吳興山水清且妍苕溪之名天下傳鷗鳧相伴一釣者
風雨不歸三板船駱駝橋上人如蟻看花馬去長安市
滄浪古調不欲聽琴簪小鮮何足睨溪流入湖清接天
鳶飛魚樂兩悠然休寧掛冠歸故里丹青想像元真子
漁童樵子俱不見雨蓑煙笠真乃爾嗟予經鉏老窮閭

文章書畫愛猶兼茲圖若以文並覘必須一字酬三縑
端午

家居州縣似新豐不作偷生折臂翁蒲歌尚能邀客共
榴花堪比舞裙紅三年艾老蓬蒿下六日蟾遺坎井中
世事古來多可笑陶然且卧北牕風

窮快活 示二子

香風嫋嫋花滿林花間鳥有快活吟吾生天與窮快活
一鳴可不如春禽憶年十八正月旦薦官船泊西河岍

東隣西舍看挑符適然有喜邀相見時予線經淚淋漓
鶚書不作令待時丁寧郡守養寒皎月支學廩供慈闈
窮快活從此得鄉黨州里皆喜色六經如天從筦窺一
方寸地開茅塞破竹方知迎刃解啖蔗漸能嘉境入看
花不上長安道桃李家山春正好馮驩有缺不能彈乘
車食魚鐘鼓考充間有子燕雀鳴打門無吏雞犬寧阿
婆含笑歸九京遺澤使人呼寧馨塞翁之馬無得失四
十年來如一日南山石爛莫奈何移家東海避干戈蛇

無橫道虎入窟隱然若有神
搗訶入吳首謁三讓廟感
古傷今發長嘯三高祠下斥鴳夷豆邊
忍覩吳為沼雲
門先生鐵笛老傾蓋相知皆絕倒
老性尚存薑桂辣不
隨蒲柳秋風掃玉山
玉泉膠漆投顏公
智公支許游墨
名儒行一年少宅我闔閭
風雨秋中吳偶作鴟雛穴
越
鳥喧呼來不絕
熊羆盧殷吳趙許
相伴滄洲弄明月華
亭清唳真可聽
獨憐士衡呼不醒
鱸魚斫鱸新釀美
坐
客有無杯不停
逃生十年聊自足
不知蘇臺有麋鹿
大

明赫赫照中天東風送我還鄉船昏鴉占盡故林樹老
鶴孤飛無宿處東門種瓜官道邊菟裘擇隣遷復遷大
兒橫山薜蘿屋小兒東洲稊稗田耕桑汲汲養吾老晨
昏定省俱舍旃每逢暑月多晝眠小牕看竹風冷然風
來扇枕竹罄折使人若見黃童賢窮快活年近百懷哉
古君子鐵面金榜客知己宜有報終身竟無策作詩示
我子若孫勿言儒冠多悞身讀書萬卷百忙底當時杜
老乃云云人生苟不識義理馬牛襟裾真可恥銅山餓

死黃帽郎莫信有錢能使鬼吾今兩眼暗如漆尚喜一襟澄似水曾聞聖人言孜孜斃方已家僮荷鍾好相隨速埋願與劉伶比黃茅嶺畔青松宅松聲為我鳴綠綺更莫用伽佗步虛污吾耳

寄小齋劉先生

延陵季子耕田處太乙老人藜焰明動筆即攜蒼頡字著書重草太玄經古苔門巷車無轍修竹堂堦夏亦清一別數年三舍近斗城猶望聚文星

簡張道履

代蔣以誠作

虛名不託爛柯仙
斫雪青山十五年
一曲樵歌人未識
瑤城江上獨先傳

二

客來東里遇炎霜
老却瓊林樹一章
賴有麟膠絃可接
焦桐流水發鏗鏘

三

雞林近有賈人來
不向何樓買襪材
坐待春風吹鐵笛

筆端還有鐵花開

寄宜興教諭

人言陽羨溪山好溪山好處能多少山無猛獸水無蛟
且喜只今逢盛朝竹姑堪入風土記茶歌可比康衢謠
學宮倚長橋高堂鳴講鼓新除學官教雨滂坐令巖邑
成鄒魯老夫憶昨覩星凰別來隔邑遙相望山如硯屏
空翠濕溪作墨池流水香火星西流拂新日暮收行秋
掃餘熱堂堦滿地落槐花衿佩誥誥立黃雪鄉無三害

風俗美賓興名賢天子喜予有一言請試聽丹梯拾級
徐徐升地因人勝地必靈邑里草生書帶青鄭康成齊
令名

思賢錄元末為宋先賢鄒忠公祠墓而作也洪
武壬戌會崑山王仲昭語及之慨然有鏤板之
意後果如其言蘭初意凡遇郡守及府教到任
各送一部庶有所觀感而不廢其祭掃之禮焉
今蘭於垂死之秋追念疇昔乃口占以抒其情

曰

故人家住千墩麓為儂版刻思賢錄祇緣見說道鄉翁
傳道程門能慎獨刻書未了謫炎荒寄聲龜巢事宜速
乃將楮幣折青蚨七萬五千錢數足不要譽不求福高
義景前修遺風振頽俗惜哉時無鍾子期聽我焦桐彈
此曲

性存真公以南泉鉏斧入天寧天叢社猶附庸
也龜巢老人作歌以送之歌曰

吾聞西方教無相無住著單提了無礙羣居亦同樂大
林新法幢天寧古道塲屋皆雲半間庭各月一方不縛
肚上箴不舐辦頭蜜何以養幼軀自種還自喫踏翻生
死海坐斷聞思修獨園銀杏樹應作石點頭

寄南京僧綱和尚

去年同看中秋月東閣開牕夜賦詩閣下桂花無恙否
秋風又到去年時

八月旦辛易齋書來知耕學袁先生客死秣陵

以詩哭之

吳門山水隔陳雷
魚鴈依然數往來
秋晚書題霜後橘
歲寒詩寄隴頭梅
但知抱道貧非病
豈料生兒禍有胎
嗟我淚從枯眼出
秋風遙灑鳳凰臺

感物

眼昏不見中秋月
疑是重雲障碧天
眠到夜深方自省
莎雞鳴我枕頭邊

二

廣寒宮闕吳剛斧桂子天香總浪傳古意正須人默識
華峰絕頂藕如船

三

青蠅盡集污衣巾白鳥雷鳴夜嚼人安得天教生處樂
百蟲俱蟄四時春

秋興七首

臺笠朝京天下同楓宸頌賞不論功人材列郡三英聚
歲事連年百穀豐村鼓鼕鼕喧社日酒旗獵獵舞秋風

螭坳誰秉春秋筆為祝皇家紀治隆

二

涼颺微起早秋初炎宇蠅蚊未盡除
歷代興亡聽燕子
幾家慈孝學烏雞面皮寧受人人唾
頭髮還教日日梳
堪笑六經俱忘却夢中猶讀啟蒙書

三

大暑方徂火始流絺衣遽易木綿裘
穹林木落風猶怒
破屋茅飛雨未休
虎豹九關冠有豸
華夷一統佩無牛

願言耕鑿終吾老老瓦盆邊擊壤謳

四

疇昔愁聞爛石歌并愁無地避干戈如今喜有清河頌
更喜橫山得薜蘿旅鴈帶人家信至霜楓似我老顏酡
紛紛紅紫時為貴老圃黃花變易多

五

矮牕兀坐嬾擡頭劍氣依然射斗牛石作文人渠自拜
木稱居士我何求看花儘有長安馬橫渡渾無野水舟

尊酒欲論今古意
叔牙何日過林邱

六

橙搗金齏紫鱠烹
客車投轄坐飛觥
一時酒興兼詩興
半夜風聲雜雨聲
人事盡隨高下手
世情多作短長檠
賣薪童子歸來晚
但說街頭酒價平

七

花巢老我六藏龜
幸爾餘生際盛時
九土方輿歸禹貢
三農風物在豳詩
蝸粘壁上涎何竭
草出山中志不移

獨有緇黃畏羈束，遷居城郭半攢着。

周可大新充糧長

千里長江萬斛船，飛芻輓粟上青天。
田家歲晚柴門閉，熟讀天朝大誥編。

二

租吏毋勞夜打門，桃源風景烈塘村。
好將擊壤歌中意，寫作丹青獻至尊。

初度言懷

并序

昔人以大塊勞我以生佚以老息以死令吾勞且
佚者三萬餘日息之宜矣

天教兩目電無光百物無勞覩短長大塊今朝能息我
奚奴便作輓歌郎

二周詩 并序

橫山謝老過烈塘而作感今思昔掛一漏萬以元
吉可大為周之白眉使先過目轉示族人大意念
先世一邱之土望為保障至如吾族之微意在言

外聞之者亦必有感於斯時洪武二十四年十二月朔日也

東西二周烈塘曲世與吾家鼎三足東周阿婆吾女兒
西周阿婆吾女叔百年世事一再變遼鶴歸來無處宿
蝦蟆之陵幸然在煙慘雲悽寒篠綠吾祖汝曹尊外翁
數塚纍纍列昭穆年年梨雪落清明貌子來作孤猿哭
周宗奕葉半憔悴遑恤蕭條渭陽旌東枝只今春意多
西枝亦復花如簇有能啣土學義烏無患觸松來野鹿

篤親苟不負前言高誼真堪振頽俗莫云古道獨行難
天將照汝光明燭

示二子自烈塘還橫山而作也曾子曰人之將
死其言也善吾於此亦云

羲皇未造書契先二五渾淪無可甄勲華繼義立人極
三代典禮星日懸人之有生必有死養生送死理宜然
一從揚墨至聃釋異端邪說多乖愆我生賴以讀書力
破浪帆我中流船蒼頭荷鍤日隨我死即埋我橫山前

母勞沙門送作佛母勞羽客送登仙漆燈不必照長夜
宰樹不須纏紙錢椒漿或酌寒食雨麥飯或灑清明煙
謝莊西頭烈塘口高曾祖禰上留田年來岸谷復變改
瓜瓞幸爾猶綿綿微如豺獺知報本汝曹慎毋忘所天
賀西傳和尚為僧司副綱

大鈞巍巍立人極緇流亦須方寸赤選佛場中選厥官
提挈綱維揮判筆龜巢老人盲且瘖刮眼欲覓黃金篋
黃河水清一快覩更看鉢羅開盛時

崑山辛彬甫夏初以人才見上奉旨還家教諸
生讀大誥限以十二月五日師生赴御前試讀
如期而往受賞而歸蘭甚以為喜作是詩賀之
白袍鵠立遙鶚行青佩鳧趨被寵光大誥三編建瓴水
春風兩袖御爐香賜金堪比燕臺聘抱玉仍歸卞匱藏
試看明年書帶草崑山多似鄭公鄉

長洲劉衡來云無錫徐伯樞縣丞重過行慶院
有詩題壁予乃次韻叙別并寄題膠山幽居各

一首

朝陽鸞鳳失巢時偶集叢林枳棘枝坐客一羶曾吐酒
過橋三笑共哦詩長洲茂苑多年別野水孤舟到處移
重搦清流弄明月秋風禪榻鬢絲垂

二

西日長安多看花東膠故邱今種瓜問奇每却人送酒
養老喜有兒當家一雜清氣比肩少七言長詩適興賒
暖香不熟古銅鼎雪梅應作先春花

送丁敬止攜室人奉母往西流乃翁寓所完聚
風雨舟車涉路難爺娘妻子聚團欒七千里外桑蓬老
十二時中菽水歡楊柳小詞聊送別葡萄斗酒莫求官
過庭煩說龜巢老新結松蘿亦問安

代簡答陳子章先生

屋山日高三丈餘盲翁負暄頭不梳客來長揖道傳語
宛丘先生今寄書開緘為我一再讀

闕

雞壇軟血闔閭城三十六年如信宿象賢無人固可吁

玉潤之壻亦可娛韓子文章妙天下李漢掇拾無遺珠
嗟予經鉏付中子書田未熟身先萎孫枝一剪一飄零
戎服西川八千里阿翁偃偃無所之況聞路難多疾藜
閉門縮首如凍龜墮甑不顧從人嗤大兒力田供菽水
小兒蒸嘗伯為禰此身幸無寒與饑祇欲全歸未能爾
每憶梁溪邂逅時買花載酒留人嬉元龍豪氣除未盡
傷春猶賦杜鵑詩一別十年今若此此去浮生知有幾
車輪從教生四角是非毋勞辨三耳峩峩陽山煙樹綠

皎皎白駒在空谷太湖流水清於玉雲影天光常在目
焦桐絃斷麟膠續彈我風雩詠歸曲詩筒不時頻往復
要見珠璣咳唾琅玕腹彼此相看如鮑叔

和鄒士文與陳子莊會飲

不談黃老不談僧不憶鱸魚似季鷹行到故人清絕處
今人能有幾人曾

水獺羶帽

代曹元度作

蠻溪水獺雪毛羶帽屋蒙戎載渾天濡首墨池頻脫去

不妨草聖繼張顛

林塘幽為鄒士文賦

林塘幽在何許梁溪之東五十里宛若浣花流水西頭
住滄洲繚繞白鷗沙青山隔斷紅塵路幽棲人似鹿門
龐畊耘持欠妻孥助清時固難遇生處聊自樂閭巷絕
車馬堦庭可羅雀門前芳草不教鉏爨下焦桐亦高閣
排衙不聞官舍鼓抱關那知兵戍柝催科吏不打吾門
知我家無田負郭穿窬盜不入吾室知我帑無金可摸

烏衣喜得客居安黃耳且無家信惡愛詩愛酒愛親朋
此外物情俱澹泊鄉來無錫山中泉潺潺日夜流青鉛
三吳化作百戰地草木血腥人亦然殘山剩水本落寞
地因人勝佳名傳老夫獨恨傾蓋晚枕書方作邊韶眠
清晨曹巖過空谷一鼓撼我龜巢邊時余春秋九十有
六年訪人嬾上山陰船卧游賦此林塘篇

謝府學教授縣學沈訓導見訪

杏壇遺曲三千齡彈與龜巢老子聽賴有青松知曲意

掀髯為我舞堦庭

二

灞橋詩客蹇驢馱同策吟鞭過薜蘿
老病送迎門不出
楊花飛雪奈寒何

別後數日知途中值雨再此謝不能固留

鄰家借酒過墻頭
楓火新鑽且易裘
風雨不留佳客住
溪山應為老夫羞
一羶冷暖忘木榻
四月清和值麥秋
珍重沈腰圍草帶
先鞭何日上瀛洲

詠懷詩奉府縣訓導

早年豪氣慕元龍，人日窮途作嗣宗。
夢斷春風金駟裏，情鍾秋水玉芙蓉。
春秋魚魯渾多誤，河洛圖書豈易逢。
四海弟兄頭白少，懷哉澗底有青松。

寄樵海教授老先生洎諸故人

室移縣罄三家墅，身作爬沙六日蟾。
生死固知天已定，盲聾可奈日相兼。
桃花笑我頻辭酒，燕子嗔人不捲簾。
吳下友朋春夢裏，休官多喜似陶潛。

寄集公詢公二講主

吾聞西方教教人無住著桑下一宿去信步恐顛錯嘉
爾兩尊者高風素相若出世扶法幢功成竟忘却掃除
煩惱魔灑脫禪律縛不隨法華轉亦不觀日落千墩片
雲間卧遊當行脚日來崑山縣山靈有佳客欣然為彈
指又見此樓閣人皆時乎時我亦樂其樂老夫數年別
每憶霞上作舍吐海潮音因風寄寥廓

寄陳明遠兄弟

先世多遺澤清風並絕塵門前馳驛路林下讀書人龍
澤靈湫古牛臺佛樹新盲翁飛不去徒憶外家親

懷辛至善

通江橋下別小海醉中聽玩世頭俱白逢人眼共青溪
山三舍隔風雨百花零賴有忘憂物千錢一巨瓶

素醞酬

楚江萍實本烏有童謠浪出詞人口社園菜根非不佳
老饕可奈無齒牙世傳淮南豆為腐山僧野人嘗厭飫

誰信窮居寂寞濱街頭買來如八珍金莖無露石無髓
眼前蔑物堪為比吾兒捧持供老親乳姑何異唐夫人
我非曾皙嗜羊棗樂與曾元同一飽澹而不厭知者誰
中庸君子古來稀腐兮腐兮能養老濟世之功不為小
淮南此術昔未傳食貨志中斯闕然前時雍公贊三德
吾亦題詩三太息易名今號素醞醕諸庖易牙僉曰都
次韻荅臧尚迪先生見贈

延陵野唱風吹去曲誤誰知顧且聽湖海卧遊春晝靜

一簾花雨集中庭

二

生兒喜有凌雲志
補屋能牽帶雨蘿
春水自流魚自樂
笑人濠上說無何

又荅毛伯尚

白石南山無復爛
朱絃流水正堪聽
斗城東北柴桑里
書屋三間草一庭

二

嘉木天生古橋梓故山月照舊藤蘿壽觥頻捧梨花酒
莫問東攔事若何

憶昔行

憶昔父子生別離濠梁流血人正苦一聲哭斷九迴腸
化作瘴煙生阿堵當時見而知者誰西門橋畔柳攢眉
從茲失却巖下電欲送孤鴻煙障迷天教兒歸養郎罷
一語不聞相慰藉有時摸索案頭書手澤未乾多羽化
去年秋初至今日白日青天閻如漆下牀寸步莫能移

食飲不分朝與夕，蒼天蒼天宜蒙見。憐早入鬼錄，如今
登仙區區有一語，請與親朋言。生兒可愛儘教愛，留取
眼光終暮年。

楊文靖公祠堂詩

立雪程門道學傳，東南瓜瓞遂緜緜。置身方到賢關地，
隻手將扶把國天。豺虎跳梁非偶爾，鳶魚飛躍自悠然。
常州舊宅今焦土，宜有蒸嘗似昔年。

送垣戍蜀屯所

七千餘里孫屯田九十六歲翁勉旃人心堅與鐵石比
天眼明如日月懸赤甲山川皆勝境黃雲壠畝正豐年
漆燈照我青松宅別後全歸日宴然

即事簡臧尚廸毛伯尚

噫吁戲痴翁百拙盲兩眸好古之人念不休
瞻言文靖祠舊在城東頭桑田為海岸為谷祠亦化作濟河伐楚
之焚舟文靖早從伊洛一派東南流時方薦賢拔其尤
遽從天上落常州至今羹牆間儀型見前修移文宜託

北山靈作室祀我東家邱二人同厥心衆毛成此裘冠
冕斯文黼黻皇猷光生劍井衝斗牛照人駿奔蘋藻羞
鳳兮鳳兮兩悠悠一鳴三千秋昔聞吳興沈東林隱居
收書散黃金長洲同姓今好古散金收書同厥心老夫
書痴年近百尚欲傍蒐二三策客來說項似楊源又說
識韓如李白孫枝璀璨珊瑚樹襟度汪洋雲夢澤區區
辦香客懷去借書數篇謄竹素高人若問欲何為欲使
迷途人快覩天倫道在科斗編朝聞夕死勝登仙譬若

丹梯借我升華顛，秘籍移來鄉井傳。饑渴可療疾可痊，
藕絲織縑顏色鮮。孤寒總得衣褊褳，客歸為我謝一言。
陰德濟人知者天。

寄呈崑山縣學訓導

崑山學舍玉峰前，玉氣氤氳暖坐氈。弦誦聲中和樂意，
浴沂童冠莫春天。

二

一株銀杏倚齋廬，長夏清風喜穆如。試問西湖林處士，

梅花誰與歲寒居

三

鄴架牙籤古典多
桑公鐵硯少年磨
借書莫笑人痴絕
矻矻編蒲老薜蘿

屯田歌

衣布襦食菑畬
奮服勤犁與鋤
三餘涉獵兵農書
惜居諸
範馳驅秋風渥
注千里駒時來躡雲衢

道旁語

欽定四庫全書

龜巢稿
卷十七

高

盲翁坐南簷
炙背日將午
兩耳未全聾
猶聞道旁語
一言賢郡守
愛民若慈父
一言江陰丞
心若秦鏡古
鮑老本郎當不覺
雙袖舞安得
普天下州縣
皆樂土人無
笑中刀物無
射工弩不憂
歲年晚不畏
冰雪苦春從
天上來百草
沐膏雨

新新堂

倚歎隱君子
城市山林靜
方寸秉彝天
皎若古秦鏡
妍姝照人面
肝膽見人病
朝朝頻拂拭
塵尾犀角柄
秋風塵

自多不到靈臺境
湯盤九字銘宜加日三省

椿萱堂

將軍大樹從錦纏
高堂椿萱香藹然
昔椿壽閱八千歲
今萱德薰三百篇
分甘穉孫遠膝下
承歡萊子舞塔前
雙親之樂有如此
虎頭應作畫圖傳

上李太守

龜山先生之學伊洛傳
道鄉先生與比肩
熊魚慎獨各有省
同在中庸書一篇
後來出處固不同
晚復同此終

欽定四庫全書

龜巢稿
卷十七

高

餘年當時州人買田宅
楊乃宅居鄒瞻田百年
世變厄兵燹宅為焦土
田荒煙府公去春下車
日蘭以缺典曾敷宣
還家薦欲去專對目盲
耳聾身莫前願言一
祠尊兩賢歸曾若曾
靈光然斧工毋勞巧
節稅畫史亦勿丹青
妍漏湖挹水注壘爵
泮池采藻供豆籩風
行四邑草必偃續成
三考蒲無鞭斯文熾
而昌劍井光燭天
瑤琴斷絃續金榜三
魁懸甘棠遺愛歲百
千不須龜趺石立
如峴巔邦人去思
肝膽鐫

老蠶

老蠶不眠食日夜作繭忙繭成上縲車雪色藕絲香垂
衣美綬冕在上供皇王衣被普天下其功實難量蜘蛛
巧如之結網能高張蟻蠊可欺者羅致日充腸予生勉
續學歲閱九十霜為蠶不為蛛賦善賴彼蒼雖無黃絹
辭斐然成厥章小則效裨補大以繫綱常制度苟無違
尺短寸有長願言後之人緒餘毋或忘

負暄

我我芳茂山為我遮朔風南陸日杲杲南簷暖融融盤
殮豆粥輒箕踞藁席重追思古義皇首出開鴻蒙宮居
食而衣生民藉軒農勲華教明倫三代禮樂隆尼山集
大成斯文萬世宗蘭也幸知此不與禽獸同年紀近百
歲心源猶四通三字四字句經訓授蒙童七言五言詩
大音鳴寸衷時無雞窠兒自號龜巢翁負暄樂如此人
言少如儂儂亦自知足作詩謝天公

代簡高彥述

長安道上人如蟻
恬澹齋中香自凝
金匱早傳先世業
玉樞誰授道家經
梅花立雪應含笑
麴蘖流霞可解醒
莫訝盲翁詩永訣
又從追蠹一撞筵

懷詹蘿屋

烏石岡頭送上船
黃楊厄閏又三年
煙蘿小隱三家墅
霜稻豐收負郭田
置酒待賓常擊缶
買書教子不論錢
盲翁恨不能飛去
永別歸來赴九泉

和遊大林菴韻

石頭數里橫山路丹井多年羽士家
聖代重開新宇宙
禪林乃易舊煙霞沿塔細草龜毛綠
護竹踈籬象眼斜
更有庭前松柏樹潮音也似學楞伽



龜巢稿卷十七